

周
易
可
說

周易可說總論 八篇

閩中曹學佺能始

門生張蔚然維成閱

彖者斷也。取象于彖。以其全體易見也。象者像也。取象于象。以其模寫難周也。德體象變合而言之。卦之蘊也。卽卦材也。夫子曰。齊小大者存乎卦。又曰。卦有大小。詞有險易。夫小大旣齊。淑慝吉凶之辨。瞭然于詞矣。此聖人明白斷出以示人也。註內典者有模象之說。以象之形體大過于人。或摸其

此而失其彼只可大畧形容之耳蓋道理無窮而
言詞有限卽書不盡言言不盡意之謂也如乾卦
之潛龍見躍飛亢坤卦之牝馬堅冰括囊黃裳之
類固象也卽元亨利貞乾乾惕若與先迷後得直
方含章亦象也大抵凡詞皆象也但有正象有取
象又有象中之象耳聖人觀象而繫辭卽觀此象
而繫之辭也卦下曰卦詞爻下曰爻詞只一象字
該之此君子居安樂玩屬平時工夫未到以動尚
占光景本義一詞而分爲象占且如潛龍勿用本

一句以讀爲象以句爲占未詳

一卦六爻講章多重二五取得中也袁儀卿語予
易重首畫以初爻爲主蓋本初辭擬之之句來而
要之皆有所未盡也道有變動故曰爻又曰變動
不居周流六虛此爻原是活潑物事豈可拘定何
者爲重何者爲輕然則汎汎無所適耶曰又不然
六爻相雜惟其時物也看此時此物歸重何處卦
中某爻足以當之卽所謂成卦之主也如乾之三
坤之四屯之初九師之九二履之六三小畜之六

四皆是何者重乾重坤始成乾坤卦而九三又重
乾中之重剛六四又重坤中之重陰也非動夫險
中則不能亨屯非一陽在下則不成震故曰初九
爲成卦之主師險道也九二一陽在二陰之中故
曰在師中吉履之六三成兌者也小畜之六四成
巽者也故履乾畜乾之事歸焉凡成卦之主力量
最重亡論陽剛卽姤之一陰便爲女壯五陽使安
身不住小畜亦只是一陰便云富以其隣大都陰
陽爻不在多寡只看其所處之時位何如故曰六

爻相雜惟其時物也。

時物者卽彖傳中時義時用時字言當此之時該有此義理該有此作用也苟當其時有義有用焉往而不爲大故贊之曰大矣哉大象中君子以自強不息厚德載物君子以經綸等語又因其時義時用之何如而寔落見之于行事也卽所謂體易也六爻中成卦之主與彖傳文言大象語多照應如乾之象自強不息九三爻詞曰乾乾惕若意義相同又不曰龍而曰君子以別于他爻也坤之文

言只六四一爻發揮出天地變化一段大道理終
曰蓋言謹也與小象慎不害也相照應且坤數偶
如囊開口象陰性謹密如括囊不出凡坤爻皆然
而獨于四發之者堪輿家所云露出元神真面目
也屯彖詞利建侯初九亦曰利建侯震彖詞震來
虩虩初九亦曰震來虩虩如此之類或明言之或
暗中含蓄或正言之或若相反所以相成但須探
討一番自見倘認得成卦之主出來則一卦六爻
之義可以旁通矣

陰陽奇偶固天地間理數之不能相無者乃若大小淑慝之辨尊卑貴賤之殊則尤關係大道理大名分而決不容以混淆假借于其間也易中變化變通等語雖云陰變爲陽陽變爲陰然只是剛柔相推而生變化非真陰變作陽陽變作陰也陰陽本體自是變不去的夫子曰齊小大者存乎卦聖人不知費多少心機用許多唇舌無非于陰易之中寓裁抑之意豈先將他本來體質混做一團如乾之用九見群龍无首本義云陽變爲陰坤之用

六利未貞本義云陰變爲陽如是則陰陽真可以相變也假如男子有時含忍巽順行陰柔的事卽變作嬾人否嬾人有時勇往裁決行剛方的事卽變作男子否此不通之論也故曰剛柔者立本者也變通者趨時者也且用九見群龍无首明天德之循環無端也用六利未貞言一于從陽而不變也又非陽變爲陰陰變爲陽之謂也解已詳本爻此說易中最爲喫緊最易惶惑故特明之

或曰如子之說陰陽不能以相變也則八卦是死

物安能變爲六十四卦且如乾下變一陰之巽二
陰之艮三陰之坤豈非陽變作陰耶坤下變一陽
之震二陽之兌三陽之乾又非陰變爲陽耶曰此
亦只是剛柔相推變在其中尚在成列因重以後
事也譬如自春而夏自夏而秋是煖變爲寒然春
夏未曾變也自秋而冬自冬而春是寒變爲煖然
秋冬未曾變也寒煖相推而歲功成亦如剛柔相
推而六十四卦成春夏秋冬特陰陽二氣之流行耳
四序尚不可變二氣可變耶且每一卦六變卽歸

易經可說

總論

五

本卦下六爻盡變爲七變連本卦成八卦以八加八卽成六十四卦則乾未始不歸乾坤未始不歸坤也卽謂之變未嘗變可也究竟所謂變者只是錯綜之說錯者陰陽橫相對也卽天地定位山澤通氣等語父與母錯長男與長女錯中男與中女錯少男與少女錯故謂之八卦相錯蓋獨陰不生獨陽不成故必天地男女對待而交錯也綜如織布帛之綜或上或下顛之倒之言陰陽上下相顛倒也如乾坤坎離四正之卦則或相上下巽兌艮

震四隅之卦則巽卽爲兌艮卽爲震而卦名則不同也綜則相雜故曰物相雜而文生然要之四正與四正相綜四隅與四隅相綜雖雜亦不雜也顛倒錯綜尚不雜陰陽之本質可相雜耶陰陽不可雜可陰變爲陽陽變爲陰耶

易有剛柔往來上下之說向止順本文訓去未推其所從來東坡曰凡易之謂剛柔相易者皆本諸乾坤也乾施一陽于坤以化其一陰而生三子皆一陽而二陰凡三子之卦有言剛來者明此本坤

也而乾來化之坤施一陰于乾以化其一陽而生三子皆一陰而二陽凡三女之卦有言柔來者明此本乾也而坤來化之故凡言此者皆三子三女相值之卦也非是卦也則無是言也凡六蠱之彖曰剛上而柔下賁之彖曰柔來而文剛分剛上而文柔咸之彖曰柔上而剛下恒之彖曰剛上而柔下損之彖曰損下益上益之彖曰損上益下此六者適遇而取之也凡三子三女相值之卦十有八而此獨取其六何也曰聖人之所取以爲卦亦多

術矣或取其象或取其爻或取其變或取其剛柔
之相易豈拘拘哉然亦有三子三女不相值之卦
而剛柔往來者如无妄之震下乾上曰剛自外來
而爲主于內大畜之乾下艮上曰剛上而尚賢晉
之坤下離上曰柔進而上行是也朱子汎汎只以
卦變二字當之不問其所變之在何卦何爻也後
漢虞翻嘗指某卦自某卦變如訟之剛來得中謂
自遯卦來賁之柔來文剛謂自泰卦來不但相去
已遠卽序卦亦顛倒東坡辯其非矣梁山來知德

始易變而爲綜綜者以兩卦綜爲一卦如同人柔
得位得中者以大有上卦之離來居同人之下卦
也八卦離正位在二故曰得中大有柔得尊位而
大中者同人下卦之離往干大有之上卦得五之
尊位居大有之中也故雜卦曰大有衆也同人親
也以二卦同體故也如噬嗑柔得中而上行者以
賁下卦離之柔得中上而行居干噬嗑之上卦爲
六五也以六居五故不當位賁之柔來文剛者噬
嗑上卦之柔來文賁之剛也分剛上而文柔者又

分噬嗑下卦之剛上而爲艮以文柔也故雜卦曰
噬嗑食也賁无色也如无妄之剛自外來者大畜
上卦之艮來居无妄之下卦而爲震也故曰剛自
外來而爲主于内大畜之剛上者无妄下卦之震
上而爲大畜之艮也故雜卦曰大畜時也无妄災
也如咸之柔上者恒下卦之巽上而爲咸之兌也
剛下者恒上卦之震下而爲咸之艮也恒之剛上
者咸下卦之艮上而爲恒之震也柔下者咸上卦
之兌下而爲恒之巽也故曰咸速也恒久也如晉

之柔進而上行者以與明夷二卦同體綜爲一卦
言以明夷下卦之離進而爲晉上卦之離也故曰
晉晝也明夷誅也如睽之柔進而上行者睽綜家
人爲一卦言以家人下卦之離進而爲睽之上卦
也故曰睽外也家人內也如蹇之利西南往得中
者以解下卦之坎往而爲蹇上卦之九五得其中
也不利東北其道窮者以解上卦之震下而爲蹇
下卦之艮也蹇難在東北故曰道窮解之利西南
往得衆者以蹇下卦之艮往而爲解上卦之震也

震二爻皆坤土故得衆其來復吉乃得中者以寒
上卦之坎來而爲解下卦之坎也二居內卦之中
故曰得中卦例自下而上曰往自上而下曰來寒
解相綜故雜卦曰蹇難也解緩也如損益相綜益
之震上而爲艮則損下所以益上損之艮下而爲
震則損上所以益下也故曰損益盛衰之始也如
旅之柔得中乎外者以豐下卦之離進而爲旅之
上卦也豐旅相綜故曰豐多故親寡旅也如渙之
剛來不窮者以節上卦坎中之陽來居于渙之二

亦得其中故不窮也節之剛柔分者在渙則柔外而剛內在節則剛外而柔內故曰剛柔分也節渙相綜故曰渙離也節止也此說雖歷歷有據然雜卦之義未必專爲剛柔往來相易而設且各卦中無剛柔往來相易之文者則雜卦又當別尋一義矣綜之之說近是而引雜卦以證之反鑿也

有八卦則錯綜以具有錯綜則變以成有變則象以立固相因之序也自王弼掃象范甯比之桀紂程伊川專治文義不論象數自云止說得七分朱

子語錄亦云卦要熟象看始親切但失其傳便是
理會不得近日來瞿唐以爲象未嘗失傳也研窮
山中三十年得之故其所註易先訓象而後言理
豫章辭儀宗侯著周易象通或取其本象如坎爲
水兌爲澤之類或取其變象如坎變爲巽巽爲長
女故曰勿用取女震變爲兌兌爲少女少長非敵
故曰匪寇婚媾之類此其說與來瞿唐錯綜之旨
相合然瞿唐取象稍廣曰有卦情之象有卦畫之
象有大象之象有中爻之象有錯卦之象有綜卦

之象有爻變之象有占中之象六十四卦逐卦排
定各干以示學者名曰啓蒙可謂極詳備矣予以
數則中除占之一字決不可入于象蓋象爲主而
占爲客象以待占占以值象卦下爻下謂之純象
可謂之純占亦可謂之象占各半則不可也中爻
之象瞿唐自言非中爻不備一句悟出不知此章
因說六爻而重初上恐學者遺却中爻故特補之
曰雜物撰德辨是與非則非中爻不備非謂初上
二爻遂無物德是與非也下文曰亦要存亡吉凶

則居可知亦重時物上講因上文惟其時物與初上句相連故復補二四三五一條此是聖人語意渾全無滲漏處豈有一卦中專重中四爻而另設一中爻之象耶其曰卦情卽卦德也畫卽體也象卽象也爻變錯綜卽變也似亦不必以此而易彼也愚謂瞿唐之錯綜豫章之象變不過就說卦中乾爲天爲園等語中取出而文王周公立象時何曾有說卦耶聖人仰觀俯察幽明死生形容物儀會通典禮何者不該之易不著之象而必專取說

卦中語耶。且必下上二卦始成一卦。如震下坎上始成屯卦。如坎下震上則成解卦。凡屯卦六爻必以屯作主意。解卦六爻必以解作主意。未聞析而爲二只以坎震二字作主意而取象也。如此則不勝其重複不勝其死煞矣。愚謂易之正象卽詩之賦體也。易之譬象卽詩之比興也。古小學六藝中有書數與六經相表裏。故曰由小學之大學也。易象未嘗亡今之小學亡矣。譬如六書中之諧聲潛龍勿用在田大人之類是也。且乾道之變化爲龍。

物之至尊爲龍則取義會意該焉其象形者如咸
之由梅至頰舌剥之由足至麋艮之由趾至輔之
類是也而取義會意亦該焉其取義者屯蒙訟師
之類會意者履虎尾觀盥而不薦震驚百里之類
是也而象形諧聲亦該焉字之通用則以亨爲享
以順爲慎之類又假借轉注之屬也書至于轉注
而變不可勝窮矣象其可窮耶且如屯曰十年乃
字臨曰八月有凶復之七日同人之三歲解巽之
三品與夫自一至萬之數錯綜順逆之形序卦上

經之陰爻多于陽者八下經之陽爻多于陰者八
綜卦上經之陰爻多于陽者四下經之陽爻多于
陰者四四句本來陰陽適均之分皆天地之正數
而不容假借者非通乎積黍穰載之妙而能知之
乎故愚謂非易象之亡而小學之亡也雖然可以
知之者尚多其不可知者闕疑焉可也

易注疏宗王輔嗣而學宮功令則紫陽氏之本義
也輔嗣掃象良亦有因蓋秦皇煽虐以易爲卜筮
之書僅得免焉漢沿其說多闡數遺理詳占晦象

如京房之鑿度子雲之太玄艱深詭譎去三聖之
旨已遠魏晉諸名流尚玄虛而落象數人標名理
家注老易間有所得如罔象之珠不由力取便足
抗其談鋒高其位置未爲後世訓詁謀也李鼎祚
集解如鄭玄虞翻荀爽于寶王肅諸家尺璧斷金
尚有存者惜無全書耳宋程正叔傳本自輔嗣語
意靜深渾然不露近日豫章以注疏程傳合刻信
無愧于雲仍也蘇子瞻以宗門之悟挾史家之筆
或談言微中或次論汪洋縱橫吐納無不如意蓋

子瞻非惟得易理且得用易之法故當時困苦流離未嘗有所屈撓其得力處全在此耳本義訓詁老婆心切不暇推求如陰變爲陽陽變爲陰及象占之說予已辨之更六爻中如小畜之下卦乾三爻以君子欲上進見畜于小人是矣上卦三爻則云以柔順之君子畜止剛暴之小人如遯之二陰浸長則陽遯矣爻之初六六二則云君子之遯在後與夫固守必遯者一卦之中乍賢乍佞何可以訓不知全部易書六十四卦原自貫串只當苦心

紬繹幾番思之思之鬼神將告之何至一卦未終便成矛盾也易卦如乾坤小畜履泰否臨觀剝復大畜遯大壯夬姤皆係君子小人消長之機聖人正于此處深心遠慮爲君子謀喜其盛復虞其衰之不暇豈有反自矛盾耶但乾坤乃天地之大義尚未可明言某也君子某也小人在乾則告以乾乾惕若而不宜自取亢在坤則告以柔順從陽而利于永貞而已然至坤亦已滿盤托出履霜之戒龍戰之窮蓋深言之矣其餘十三卦如泰否剝復

夫姤之類明白易見者人皆知之至若小畜履觀大畜四卦中間尤涵蓄深邃所云當費幾畚紬繹者也予于本卦及總論中俱詳之然朱子于他著述多所愜意而周易一書謙讓不遑其命名曰朱某集註或問卦象曰便是理會不得夫子曰五十以學易可以無大過矣大過云者卽所謂不知而妄作者也夫子不敢輕言之矧其他耶周九用六之誤象占各半之非與夫一卦君子小人之矛盾予觀註䟽已然朱子特相沿之而不察耳故予謂

一意宗朱而人超人諾不敢有所異同者固非也
或有意悖朱而挾其一得沾沾以自喜者亦非也
近日講章陽標尊朱翼朱之目而其實大刺謬不
然者尤非也予初順本文講引用本義程傳蒙引
兒說疑問來知德易註居多王弼註疏東坡易傳
黃司徒讀易私記蘇紫溪生生篇李卓吾易因焦
漪園易筌及李鼎祚集解坊刻周易宗義原係裒
輯諸名家皆于註解中見之語云千金之裘非一
狐之腋也間出已見謬爲箋釋者必其有大不安

于心而擬議再四始敢冒罪我之誚尤願與同志評之

夫子曰作易者其有憂患乎又曰易之興也其文王與紂之事耶吾夫子不曰無憂者其惟文王乎父作之子述之則文王未嘗有憂也因于姜里內文明而外柔順靖共臣節死生以之又何嘗有一朝之患也夫文王三分天下有其二以服事殷其德至矣繼之者不亦難乎周德彌邵而紂惡貫盈前則脫西伯于難而佐武王以順天吊民旣則誅

管蔡遷頑民而不利孺子之詞非金縢之發無以
自解免之數者周公事也周公責也九卦之序始
履而終巽履天澤之分也曰和而至巽行權之道
也曰稱而隱惟其至也此德之所以爲盛也惟其
隱也尚可以明示之於人與龍戰之窮武人之凶
見鬼之車于沙之言交集于其躬自蹈之而自述
之憂莫憂于斯矣患莫患于斯矣楊廷秀曰无寇
言備寇者不若遭寇者之爲密无虎言防虎者不
若遇虎者之爲工意之者不如履之者也呂伯恭

曰蘇洵之易只說出近而不相得則凶或害之一句予觀彖辭主約爻辭主詳彖辭多吉爻辭多凶說者以彖合言之爻析言之故然殊不知周公者正所謂遭寇遇虎之人而凶或害之者也是故非讀東山鴟梟之詩頑民洛邑之誓則不能得周公爻辭之所以也彖引而不發有傳焉以發揮之爻曲盡而旁通有象焉以推原之是故讀文王之易而居要不煩知其爲盛德之言讀周公之易而推見至隱知其爲憂患之至讀孔子之易而原始要

終文王周公之旨始合一而不相悖矣

四庫全書總目。周易可說七卷。明曹學佺撰。是書以象占為主。於前人中。多采來知德易注。而深疑朱子本義。如謂凡辭皆象也。本義一辭而分為象占。如潛龍勿用。本一句而以潛龍為象。勿用為占者。非其說頗允。又謂陰變為陽。變為陰。只是剛柔相推而變化在中。非真陰變為陽。變為陰。譬如男子有時行陰柔的事。即可變作婦人。否。婦人有時行剛方的事。即可變作男子。否云。則殊膠固。不知變論其德。不論其人也。又謂如小畜之下三爻。本義云。以君子欲上進。見畜於小人。上三爻則云。以柔順之。君子畜止剛暴之小人。遯之三陰浸長。則陽遯矣。爻之初六。云。則云。君子

之遜在後與夫困者又遜者一卦之中乍賢乍佞云云不知易之理變
動不拘隨爻取象不可以一格繩也亦自為一家之說而已矣

在目二

周易上經可說卷之一

閩中曹學佺能始撰

三三乾元亨利貞

一者奇也陽之數也乾者健也陽之性也此卦六畫皆奇上下皆乾則陽之純而健之至也故乾之名天之象不易焉元亨利貞文王所係之詞以斷一卦之吉凶所謂彖詞者也元大也亨通也利宜也貞正也乾道大通而至正有天道必有人事人而純乎乾也則其陽明直遂之氣與天爲一當得大通而无所窒礙然尤必運之以正乃可以保其終也苟有一毫人欲之私而不正焉亦安能合德于天者哉

乾天德也六畫皆奇乾而又乾純是天德用事更那一件做

不來那一些行不去故曰元亨利亨者大通也然天下之大通者惟是此正少有不正便違了本體故又緊切下利貞二字元亨利貞是合下俱有的貞者時也理也言變易隨時以就于理也卽君子之自強不息與夫乾乾而惕若也爻詞潛見惕躍飛亢何者非時何者非隨時以就于義理是故用亢見群龍无首吉彖傳大明終始六位時成時乘六龍以御天卽利貞之謂也朱子解正固二字本文言貞固上來不可拘泥○元亨利貞天德也天德人事相爲表裏故直就人事上講此卽乾之象也卽彖詞也占者占此而玩之也

初九潛龍勿用

初九以陽在下是龍德之脩于己者本足以霖雨蒼生而阻于

時之未遇故其象爲龍之潛誠宜養晦俟時勿輕出以求用也
易傳曰乾之所以取于龍者以其能飛能潛也飛者其正也
不得其正而能潛非天下之至健其就能之此正字屬時上
講○潛藏也勿用未可以輕用也純是爻詞而占者所當玩
也若以潛龍爲象勿用爲占則穿鑿矣

九二見龍在田利見大人

九二剛健中正有其德矣出潛離隱有其時矣所以得君行道
沛膏澤于民者惟此時爲然矣其象曰見龍在田自非盛德大
人孰能當此者乎故爲君若民者一快覩之以資其道而蒙其
澤何不利之有

剛以体言健兼用言居下之中中也九居二非正也而曰正

者時當見故曰正也。出潛離隱承初爻而言田在地之表而
有人功者以澤及物言。澤及于物物所利見也。大人以德言
大人不出則已出則澤必及物物必利見之矣。○九二與九
五大人但就本文上講。

九二君子終日乾乾夕惕若厲无咎。

九三重剛不中居下之上乃德隆望尊衆所側目者也詎不稱
厲階哉。然而性体剛健知危能戒是爲君子者。內思德業之當
修外思艱大之難稱。憂勤振刷夙夜匪懈故不惟乾乾而且終
日乾乾焉。不惟終日乾乾雖至夕猶惕若而不怠其乾乾焉。如
此則其所以出之于身而行之于事者必以其道而不敢肆矣。
雖處危地上信而下從之又何咎。

重剛以上下皆乾而言是屬陽明太過一邊猶云聖之清聖之任者也此是先發其性格如此但含蓄未明耳下文性體剛健正承重剛之意而分明著其心性之克謹也不中二字正起居下之上一句以九三所遭之時位言也乾健也終日乾乾卽自強不息之意夕惕若雖至夕其心猶不放下如終日之乾乾也屬以時位言无咎以義理言言其時雖危其事无過差也易主義理以无咎爲重○或問九三非龍德與曰進乎龍矣此上下之際禍福之交成敗之決也徒曰龍不足以盡之故曰君子夫初之所以能潛二之所以能見四之所以能躍五之所以能飛皆有待于三焉甚矣三之難處也使三不能處此則乾喪其所以爲乾矣天下莫大之福不測之

禍自率于我而求決焉其濟不濟間不容髮是以終日乾乾至于夕猶惕然雖危而无咎也君子二字在乾卦猶云當家人耳

九四或躍在淵无咎

九四以陽居陰本是能疑之人居上之下又處可疑之地故其所爲非尋常人之所爲者不得不疑慮却顧極其詳審而不敢漫然以嘗試豈非猶龍之或躍于空洞之鄉迹將近而躊躇勢將進而次且也哉如此而進則合乎天理當乎人心斯无咎矣或猶言將欲也躍本是起或躍則未便起也二四之高低當于見躍二字別之不可泥田與淵田是寔地淵之勢反易于飛騰也○大抵變革之際非常之事卽聖人處此亦遲回審

願有不敢輕遽爲者誠重之也重之則已可以无失而亦不
至于禍天下萬一不慎不幾一跌而亦吾族乎四本當躍且
聖人爲下一或字直令斟酌小心方與无咎盖其所處非直
九三之高危而其所兢畏又甚于三之乾惕也○或躍在淵
亦不專主革命者說如伊尹之放太甲周公之征管蔡其一
舉動關係天下匪小必放之不以爲專征之不爲禍天下
乃可行事故取象于躍淵盖聖人處發節之地亦必四顧而
躊躇也○三與四皆禍福雜必有以處之然後无咎

九五飛龍在天利見大人

九五剛健中正而居乎尊是聖人在天子之位制禮作樂以立
臣民之極如龍飛于天而霖雨天下者焉此誠德位兼隆之大

人也故君子見之以慶雲龍之會小人見之以承膏澤之施否則有負于明時矣何利哉

此大人德位時兼脩之大人也龍飛于天神化不測故象之萬物快覩之謂見蒙其休澤之謂利

上九亢龍有悔

上者最上一爻之名亢者過于上而不能下之意蓋乾体既脩上位既終是進極而退盈極而虛之時故曰亢龍聖人无亢時有亢也苟不知變通而與之俱亢則其所損者多矣豈不有悔亢者人之喉骨剛而居上是也亦上而不能下信而不能屈之意陰陽之理極虛必變陽極則生陰陰極則生陽此消長盈虛一定之理數也龍之爲物始而潛繼而見中而躍終而飛

既飛于天至秋冬又蟄于淵此知進知退變化莫測之物也
九五飛龍在天位之極尊時之極盛矣若復過于此則反爲
亢其時使之然也有悔者悔其所必有也雖然處此者豈无
无悔之道哉故言有者亦非必然者也

用九見群龍无首吉

六爻皆九若爲九陽則必至于亢吾惟有用九乃見群
龍之无首焉龍可見也首不可見也時而潛淵時而在天豈可
得而拘哉吾妙用乎天德而弛張闔闢使人莫測其朕亦如群
龍之无首矣龍非无首而見之者若以爲无首也如此則時乘
在我循環无端何亢之有故曰吉

此一爻承承六爻言故不曰龍而曰群龍也爻者交變之義

龍者變化之物。如以潛龍爲首。則一于潛而不能見。如以見龍爲首。則一于見而不能潛。其何變化之有。純乾聖人渾身一團天道。能潛而又能見。能躍而又能飛。无少欠缺。无少凝滯。若天道之動靜无端。陰陽无始也。安見其有首耶。此卽是彖傳時乘六龍御天。大象自強不息之意。雖揔承六爻言。然緊接上爻。尤重无龍上講无首。則不至于无善處。无則吉。

彖曰。大哉乾元。萬物資始。乃統天。○雲行雨施。品物流形。○大明終始。六位時成。時乘六龍以御天。○乾道變化。各正性命。保合太和。乃利貞。○首出庶物。萬國咸寧。

彖傳以天道明乾義。蓋謂大矣哉。乾之元乎。昊天以生物爲心。而元也者。乃生生之音。爲之肇端也。故生意一動。而群生賴其

雲爲庶類以之胚胎是始者物也而所資以始者元也然不徒
始乎物已也天德之運固不容息而生生之意无所不該亨者
元之通也利者元之遂也貞者元之成也蓋舉四時歲功而皆
一元之兼統矣夫始萬物則有父道統天德則有君道合而觀
之元之大何如哉何以見乾之亨也造化之運與時俱顯有時
而雲行者沛然雨施者沛然其氣之運于昊天者既發舒而不已
而品物得天之氣者自日新而不窮將見形者形色者色而資
始之始至此爲之愈彰矣夫雲行雨施造化之通也品物流形
物之隨造化而通也此乾亨之義也然是元亨也不惟造化有
之聖人亦有之彼自貞之禪而元也元之禪而亨也此造化之
終始皆時之所爲也聖人一心造化爲伍孰能外其洞徹中乎

由是以天之道而知易之六位所以變動不居者亦時之所爲也
天以時而成化易以時而成位聖人獨能外是時以成治功也
哉由是乘此六龍變化之理以見于臨民出政之間時剛而剛
以憲天之陽時柔而柔以憲天之陰時所當先則先天而立極
時所當後則後天而弘化是昊天流行之運惟吾所駕馭之優
如矣斯則不惟見乎易也而有以体乎易不惟知乎天也而且
法乎天其政教之及物而膏澤普于宇內者亦一資始流行之
會矣非聖人之元亨乎又何以見乾之利貞也蓋乾者生物之
祖也理氣之會也自其既動而起夫靜則其來紆徐而有變以
爲化之漸動極而歸乎靜則其運无迹而有化以爲變之成斯
時也一物各具一乾元而性以之歟命以之立如此其各正而

不偏也。萬物統體一乾元，而陰陽會合，生機盎然，如此其沖和之凝聚也。夫各正保合者，物之成也，而寔天成之也。由造化之入，以鼓萬物之入，而卽萬物之終，可以見造化之終，是非所以利貞乎？然是利貞也，不獨造化有之，聖人亦有之。彼聖人在上，萬國咸瞻，其作新鼓舞之機，已顯于乘龍御天之日矣。至此復何爲哉？但見垂衣端冕，如天道之運也，而萬民之性命自此而各正焉。體元居正，如天象之垂也，而萬民之太和自此而保合焉。民生以遂，民德以正，順帝之則，莫知其然。茲其爲聖人之利貞矣乎。

彖斷也。斷一卦之材也。○首節論元元之爲德，不可見也。其可見者，萬物資始而已。天天德也。天之德不可勝言，惟元爲

能統之此所以爲大也○无中初有曰始无始而不資于元
元亨利貞皆天德也天生生不息而元之生生一動直貫終
始而不息是盡天之造化皆此元之統括也故曰乃統天乃
字乘資始而言○或問乾元審始何如曰天地之間只是這
段元氣耳人與物揔在元氣包含之內元氣伏藏人物之氣
亦隨之而伏藏至此則元氣初動萬物之氣伏藏在內者賴
其溫暖醞釀亦隨之而動也○次節雲行雨施是氣亨流形
是物亨然重在下句蓋卽物之亨可以知造化之亨也雲雨
非二物雲一行雨便施矣薰蒸透徹爲雲沾濡流通爲雨皆
生氣之不可抑遏處而種種物形與之而俱流此所謂時雨
之化也○品物流形當依資始例看蓋天地氣動則萬物亦

皆動天地氣流則萬物亦皆流矣。流字有生主不已之意。品物露出體質便從此透迤生去續續出來故曰流也。流者流行不滯此卽是亨通處。○萬者物之揔數。資始之時氣初動而形未成故揔言之曰萬。至此則洪纖高下氣達而象可見象見而形日長區以別矣故謂之品。或曰萬兼動植品但以植物言此蓋以雲行雨施爲泥耳。然則天作雲雨僅爲草木之生。○乎設使雲雨不時亢旱爲災鳥獸魚鼈果能長育爲吾人者果亦能遂其生否乎。或又曰動物四時皆流形不必至亨時也。曰品物亦有在冬肇胎者何必至春乃資始乎。若執泥而論然則萬物萬字亦兼不得動物而天地四時只專爲植物設矣。豈有是理。○品物流形試卽人身驗之夫人在

天地氣中、當其秋冬氣亦隨之而伏、及其始春陽氣之內伏者亦隨之而動、迨至于夏則此氣發散出來、自然形體滋潤、居處安適、豈不是流形之驗○大明是人心靈明之體、卽大學之明明德也、天理昭明、一始便通、更无一毫障礙、人心靈明、胸中原自洞徹、稍有障礙、便與天不相似、惟聖人之心、不徒明、而且大明、緝熙徹始徹終、更无一物得以礙其性靈者、由是觀一卦六爻之位、與時偕行、无非天道、无非吾心、闔闢進退之權在我矣○始字、卽承上文資始之元也、而必先曰終者、見終而復始、迭運不窮也、乾道之終始、不過一時、時便有个漸次、在乾之六位、初二三四五、上次第而成、昭然乾道之終始、此便是六龍、此便是天道、聖人時乘以御天、則不獨

能主大始而雲行雨施之澤遍洽于光天之下矣此聖人之
元亨也○乘者憑據也御運用也皆因龍字借用但以六位
言則曰時成以六龍言則曰時乘乘龍御天云者乘此六陽
以行天道天道自我而行也○或問時乘六龍是如何光景
曰此只是會意就此章言之在天道則爲陰陽之相禪在六
爻則爲潛見惕躍飛亢各以其時布列耳安有貞元之相禪
哉在聖人出治則爲張弛翕數等事各隨其時施行耳安見
有潛見惕躍飛亢之序亦安有貞元之相禪哉若必曰當潛
也而謹密當見也而敷施當惕也而戒謹當躍也而審幾當
飛也而有制作之妙當亢也而有轉移之機夫聖人行天道
豈拘拘此六者作用而已哉聖人自有庶政萬幾只用六陽

以時迭見之意而行之非直以潛見惕躍飛亢行天道也○
乾道天道也變化亦不專屬何時揔言其推遷代謝无有止
息耳乾道之變化既如此時至于利物自遂時至于貞物自
成所謂氣候相催也乾道利貞不可見故以物之各正保合
言之各者各各不偏也正者正而无缺也有不相凌奪不相
假借之意屬利邊多保者保而不失也合者合而不分也有
充然充足盎然發生之意屬貞邊多然利則向于實貞則實
之成同功一体者也○性者理之一定命者理之流行太和
者性命之渾合而無間非性命之外別有所謂太和也元之
始也始此性命也亨之通也通此性命也至于利貞則天理
之一定者秩然于吾心而人人各有是性天理之流行者渾

然于吾心而人人各有是命何各正也率吾之性而无所拂
于命順吾之命而无所達于性此太和之保合也此天之所
以成乎人而人之所以成乎天也○首出庶物以德言蓋人
有是性命而自戕之人有是太和而自拂之物于物者也聖
人盡性至命致中致和是出乎類拔乎萃高出于萬物之上
者也盡吾之性而盡萬物之性立吾之命而立萬物之命致
吾身之和而育萬國之和此便是萬國咸寧氣象要之聖人
无日不經綸亦猶乾道无日不變化但庶民之各正保合如
萬物之在變化中者聖人從容以俟之而不見其經綸之迹
耳夫何爲哉泰已正南面而已矣此之謂也

象曰天行健君子以自強不息

乾之象天也。此卦上下皆乾，則是天之行也。今日一周，明日一周，近則環春夏秋冬，而未嘗息；遠則歷元會運世而莫之窮，信非至健不能也。君子體之以人之心，卽天之運也。惟私欲間之，于是健者或息，而與天不相似矣。故必天德之剛常主于中，而物欲之私不乘于外，合動靜貫始終，恒一而無二，何息之有？蓋惟自強故不息，惟不息故益見其強。君子之善法天也如此。象法像也，像其卦爻之德也。○天惟健故不息，人有息則不得爲健矣。自強二字，分明是克己功夫，做成了此心之中，純是天理用事，卽內而已。私外而物感更无一毫得以間之也。學不厭教不倦，是自強不息之心也。夫子自道也。

潛龍勿用，陽在下也。

陽德居下君子處微未可以輕用也

見龍在田德施普也

龍見便有雲雨之施聖人見便有德澤之施施則普被于上下矣

終日乾乾反復道也

大臣居高履危全在此心之運量日乾夕惕啓處之不遑正是其反覆于胸中必无憾而後卽安也

道字虛者卽行字之意有說反覆于斯道者欠活潑

或躍在淵進无咎也

量可而進適其時則无咎故夫子加一進字以斷之

飛龍在天大人造也

造作也言作而在上也是以聖人而居天子之位者也聖人作而萬物覩矣

亢龍有悔盈不可久也

盈卽亢矣不可久致悔之由也慶亢之道在乎不盈所以變通

而可久也

用九天德不可爲首也

乾天之德也天之德終始相禪循環无端豈可以爲首哉用九者法天之功亦當如是所以体无之德也

天德不可爲首以天德本无首也天之氣有首有尾故歲以春爲首月以朔爲首而德則渾渾全全引之莫知其始要之莫知其終更无可爲首也使天德而可爲首則分六龍爲六

截豈成片段用九者純全天德循環无端君子以自強不息此之謂也

文言曰元者善之長也亨者嘉之會也利者義之和也貞者事之幹也○君子體仁足以長人嘉會足以合禮利物足以和義貞固足以幹事○君子行此四德者故曰乾元亨利貞

文言以人道明乾義蓋曰元亨利貞一也在天道則爲生物之始終在人道則爲大德之始終自今觀之人之仁非卽天之元乎是元也未有衆善而其理先具既有衆善而其理又无所不該與乾之始物而統天者一也是善之長也人之禮非卽天之亨乎是亨也有經而等美之渾然者以具有曲而殺美之燦然者以呈與乾之品物流形者一也是嘉之會也人之義非卽天

之利乎。是利也。舉尊卑上下之間。匪不截然有分。以相守。而要其分之所宜。卽心之所安。則義而未嘗不和也。是亦天道之所以利物者也。入之智。非卽天之貞乎。是貞也。舉是非可否之臚。匪不了然明晰于胸中。而卽其知之之明。卽守之之固。則事皆依之以立也。是亦天道之所以成物者也。蓋天以是四者付之人。人以是四者受之天。此德之全也。兼而体之。有不在于君子哉。君子以仁爲体。而自念慮之間。以至事爲之際。无一之非仁焉。則仁以涵愛之本。愛以達仁之用。舉凡萬民萬物。悉在其包容者。取足于吾心之仁而有餘也。不足以長人乎。嘉其所會。而自綱常之大。以至動作之微。无美之不聚焉。則其至精者。有以合禮之綱。至詳者。有以合禮之目。所以經之緯之。罔不爲曲中。

者取足于吾身之美而有餘也。不足以合禮乎？利本義之和也。君子因物處物，而若尊卑，若長幼，使之各得其分焉，則其分之
嚴者固義也，而因分以相愛者，又若是其和也。謂不足以和義
乎？貞本事之幹也。君子知正之所在，而寔見得是，寔見得非一
于是而不遷焉，則其知之明者，所以成乎事之始也。而其守之
弗去者，所以成乎事之終也。謂不足以幹事乎？夫体仁長人，嘉
會合禮，則有以行元亨之德矣。利物和義，貞固幹事，則有以行
利貞之德矣。故在天之乾，則爲春夏秋冬；在君子之乾，則曰体
仁合禮和義貞固。惟君子爲能配天。惟君子之四德足以配天
之四德。故曰乾元亨利貞。

元者吾人生生之心，人性皆善，總是生生之心發出來分之

則有衆善合之只是一善如造化許多光景揔是一段生意耳故元爲善之長然有是生生之意卽生而不可已如禮儀三百威儀三千俱是發育峻極妙用處必有是人文方可經緯天地化成天下豈不是衆美之會然此嘉美藹集宣洩殆盡要其指歸必使物物得所而後已故利者非一身之利也天下人之利也義者是處天下之人使之各得其宜大學之所謂絮矩是也義行于家則家之人交相安而和義行于國則國之人交相安而和義行于天下則天下之人交相安而和和卽利也聖人之利利在天下故曰以義爲利後世之利利在一身故曰以利爲利利不利之間相去遠矣然事体合宜處便是一定之準則故貞者天地間一个恰好正當道理

蕩蕩平平不可以私意減不可以私意增者也正則行是行其所當行不則止是止其所當止一時之利害有所弗顧衆口之毀譽有所弗徇必如是而後爲事之幹幹者如木之幹而枝葉依之以植立也○仁者人也原非二物君子体仁而與之合一則舉一身皆仁之充溢舉天下皆吾之一身故足以長人長者君長之長言仁者宜在高位也亨者嘉之會君子嘉其所會則禮之本体合着而不參差故足以合禮蓋嘉非難嘉其所會爲難如得其一不得其二非嘉會也得于此不得于彼非嘉會也得者什百不得者猶二三非嘉會也必自一動一靜一語一嘿以至辭讓授受往來酬酢之間皆爲至善恰好天理人情之至而无不嘉美乃合乎禮何者禮天

理之節文人事之儀則經者三百曲者三千纖悉具備故必
嘉美輟集而後與之合也利有裁制之意君子以物處物使
各得其所而無不利如此而爲義者如此而爲和更无一毫
之乖戾故足以和義貞固是寔具此正理而完固无失則萬
事萬化皆權輿于此蓋事非正不立非正而固亦恐有時而
壞也君子行此四者則與乾元合其德矣故曰乾元亨利貞
初九曰潛龍勿用何謂也子曰龍德而隱者也不易乎世不成
乎名遯世无悶不見是而无悶樂則行之憂則違之確乎其不
可拔潛龍也

聖人神明不測故曰龍德隱者在下位而未見者也乾之初九
龍德而隱者也何以明之聖人一身道之所在故但知道之在

我者當如是未嘗變易吾行以徇時好亦未嘗炫耀所長以干時譽夫惟其不阿世也則世既不宜之必或爲世所遺而遜世矣夫惟其不務名也則人既不知之必或爲人所訾議而不見是矣且中心泰然絕無芥蒂斯道在我何悶之有故或道與時通則兼善天下固不急于求通也道與時乖則獨善其身亦不因之諱窮也用舍无與于已行藏安于所遇確乎自守之堅有非富貴貧賤所能奪者此皆龍德而隱之事所以爲潛龍也

龍德而隱四字是頭腦下文發明此句耳聖人具有龍德不與世爲推移不易世便不成名便遜世不見是此一套事聖人之心却不以爲事未嘗一毫芥滯于胸中其所知者樂行憂違確乎不可拔耳不可拔正應不易乎世句然不曰用舍而

曰憂樂者聖人無憂樂以天下爲憂樂樂則行憂則違確乎其不可拔此方是聖人心事聖人有此心事而豈與不忘世故者之隱同乎哉又豈與甘心枯槁者之隱同乎哉此其潛爲龍而潛者也本文之義惟孔子足以當之○大抵人有一切世味一切好名之念馳于胸中得不勝喜失不勝悶此身精神全在外走作隨時動轉如何不可拔不易乎世者胸中原无世味不成乎名者胸中原无名心无世味則忘進退矣无名心則忘是非矣可行則行而亦可以違可違則違而亦可以行吾之胸中原无加損也此之謂不可拔講畧重在憂違上盖因初九之時而善其憂違之操也

九二曰見龍在田利見大人何謂也子曰龍德而正中者也庸

言之信庸行之謹閑邪存其誠善世而不伐德博而化易曰見龍在田利見大人君德也

九二之龍德猶夫初也而時當正中則已出而見用于世矣何以明之人惟德有未至則于言行之間多所濶畧而九二盛德也無論其大者卽凡平居議論之言亦必心口相孚而信焉尋常末節之行亦必步趨不苟而謹焉若此者似乎无邪之可閑矣彼則无數亦保之念每切于理欲乘除之閑所以捍外誘而全其真純者惟恐言焉有所不信而行焉有所不謹也又似乎有善之可伐矣彼則內懷不足之心外示冲虛若谷之意所以務精進而忘其滿假者惟恐防閑之未盡而不見有善之可張也斯之爲德豈可測識而限量之者哉大而化之固不自知而

舉世在其感格之內亦莫知其所自也人利見之宜矣故曰見龍在田利見大人言有此德而後可以長人乃君德也

龍德與初九无異揔之陽明便是龍德正中承初爻而言初之潛未及時二已出潛則正當見用之時也○信是真是謹是篤敬此卽閑邪存誠事此卽善世處信謹卽誠不信不謹卽邪有一毫矜伐之意亦卽是邪也庸言亦信庸行亦謹卽是閑邪存誠工夫德博且就自家說卽是盛德化則被其德者皆感化之而不知也君德者君人之德也有此德方可以君人如孟子所謂居仁由義大人之事備矣之說非必王天下爲君德也雍也可使南面正君德之謂○易因曰九二旣稱龍德而奈何所言所行直庸衆人類乎夫庸人之言行不

敢以不信不謹也一不信不謹則入于邪而禍患立至矣今九二之言行乃直與庸衆人類焉故以此善世則世自善也非二能與之也其將誰伐乎以此爲德則周博四海默順而不自知也其又誰不化乎其德如此故稱龍德焉是故易知而可親也易從而有功也无善世之迹而有善與人同之行无化人之名而有德博而化之寔其德如此故又稱君德焉然則九二之所謂大人者如此而已矣設使九二有一毫過人之行便欲強人以所不能拂人以所不欲不本忠信不近人情人其利見之哉按此說善世二字不同

九二曰君子終日乾乾夕惕若厲无咎何謂也子曰君子進德脩業忠信所以進德也脩辭立其誠所以居業也知至至之可

與幾也知終終之可與存義也是故居上位而不驕在下位而不憂故乾乾因其時而惕雖危无咎矣

君子之所以爲君子者以其德業有諸身也九三朝乾夕惕政欲德自我進而業自我修耳然進脩以何者爲本蓋忠信者吾人與生俱生之至德而天命之精微也發之于言則爲有物之言履之于行則合時措之宜所謂誠所謂業所謂義皆此也苟吾心之所存者有一念之不寔則固有之良且自我喪之而德胡以進故惟內主忠信而以真寔不欺爲根本焉斯卽心卽理有日長而无日消矣故曰忠信所以進德也然此心所得之理而見之于事者倘有一言之不寔則反以浮華而蕩其真樞更何益哉殆必修省言詞恒切躬行不逮之耻有是言也而必有

是事也誠自我而立斯卽事卽終身居之而不遷矣故曰脩
詞立其誠所以居業也然則忠信其道理至極之地乎至之所
在卽幾之所在也天下未有至極而不微妙者也脩詞立誠其
道理歸宿之地乎終之所在卽義之所在也天下未有无本而
能待用者也人惟不知其至而至之不知其終而終之則亦无
望于進德修業矣故必知忠信者卽道理之至極而不容以毫
髮加者也由是心一忠信以至之蓋理本如是吾懇切以詣其
極而已然則天命本体之微不在于我乎誠精而明淵源洞徹
而无遺矣德至此始進矣蓋在理則謂之幾在心則謂之德而
幾之極豈非德之進也哉又必知立誠者卽道理之指歸而不
可以須臾離者也由是務立其誠以終之蓋理本如是吾畢力

以歸其域而已然則事物裁制之宜不存于我乎誠應而妙資
深逢源而至足矣業至此始修矣蓋在理則謂之義在事則謂
之業而此義之脩豈非業之修也哉九三之進德修業如此故
居上位而見大忘小自不爲勢所張何驕之有居下位而在我
者重自不爲勢所屈何憂之有可上可下不驕不憂所以乾乾
惕若雖危无咎也

忠信卽是誠誠在事上卽要立脩詞雖曰省其言詞亦不是
有心去刪削他只云言語畧少說此緊含有敏行意在言行
相離不得一邊過則一邊不及謹言則敏行此段真是道理便
植立不倒了故做得一事此一事便真寔便可居之終身曰
居業者業如屋宇業修則修既修則居之修業便要居之也

此四句論其大畧工夫全在知至至之、知終終之上。朝乾夕惕之精神全注于此。然何以忠信便是至、修詞立誠便是終。盖吾人總一向往便有个至在、總一動履便有个終在。是徹首徹尾无始无終的道理。至者天理之至極、大學所謂至善終者事理之歸宿。孟子所謂終條理、知至至之、必至之而後爲知至也、知終終之、必終之而後爲知終也。是忠信立誠工夫要做到盡頭處。所謂君子无所不用其極也。與幾其知幾之神乎。神天德也。存義其精義之化乎。化天道也。德業至此總算得是進修。然幾字雖含有知字意却不全在知上。曰與者言到那邊故與之合一也。天命之精微完完全全在我非至德而何。存義者天下事千變萬化難以預定而莫不有个恰

當道理。君子于事理之終。既已身與之安。則隨事至物。來以時措之。而皆得其宜矣。其曰可與存者。卽知終終之。而許其義預存于此也。存義者。如俗語有本錢。本錢多者。業自厚。非大業而何。是故居上位而不驕。在下位而不憂。德業有諸已。自然隨處皆宜也。无咎。跟着不驕不憂上來。主義理說。

九四曰或躍在淵。无咎。何謂也。子曰。上下无常。非爲邪也。進退无恒。非離群也。君子進德脩業。欲及時也。故无咎。

吾人之出處。其位固有上下之殊。而其身亦因之以進退焉。今九四也可以上而不遽。上籌度于上下之間。何无常也。跡似乎行險以僥倖而爲邪矣。然其心實有所見。而非爲邪也。可以進而不遽。進詳審于進退之際。何无恒也。迹似乎產異以駭衆而

離群矣然其意寔有所在而非離群也蓋其德焉已進而无俟于進矣業焉已脩而无俟于修矣正欲相稅而動有濟于時而不失乎已之謂也如是復何咎

躍有上下進退意或則无常无恒矣非爲邪非離群是白其心之无他欲及時是表其心之有在非字欲字正相應○上下進退俱活字爲邪離群无大別爲邪必離群離群是爲邪君子就九四言進德修業正于此處得力舉動一不當德業之謂何進修之謂何其遲回審視而不敢輕遽爲者正欲其及時也及時上着一欲字發九四所以或之之意及者不先不後恰中稅字之謂

九五曰飛龍在天利見大人何謂也子曰同聲相應同氣相求

水流濕火就燥雲從龍風從虎聖人作而萬物覩本乎天者親上
本乎地者親下則各從其類也

天下之物凡同聲者以聲感聲自相應也凡同氣者以氣感氣
自相求也濕有以召水也故水皆流濕燥有以召火也故火皆
就燥龍嘘成雲龍感而雲從也故雲從龍虎嘯風生虎感而風
從也故風從虎聖人者受命興起于上則萬物快覩于下誠以
聖德之所感召而萬物自无不應之也如天輕清在上者也本
乎天者輕清之意多故與上相親地重濁在下者也本乎地者
重濁之意多故與下相親蓋陽從陽類陰從陰類各以類聚而
不可強者也又何疑于聖人

本乎天本乎地不必以動植言亦不必以星辰草木等言大

抵屬陽多者就是本乎天卽與上相親屬陰亦然故曰各從其類亦不必以此三句爲明所以利見之意揔是泛論物理上九曰亢龍有悔何謂也子曰貴而无位高而无民賢人在下位而无輔是以動而有悔也

上九者位高而貴賢人皆在吾下者也旣謂之貴自是居有位者但以其志滿不能小心以慎乃位故曰无位耳旣謂之高自是統有民者但以其志滿不能巽志以体下民故曰无民耳旣在下有賢人則自是爲我輔者但以其志滿不能虛已以任仁賢雖有輔若无輔耳皆亢意也是以動而有悔也

无位无民无輔是上九自无之也所以爲亢

潛龍勿用下也

初九居于下位未值可爲之時故耳

見龍在田時舍也

舍止息也二已出潛離隱而止息于田也霖雨萬物宜矣

終日乾乾行事也

居大臣之位其所當行之事何限有不容以旦夕寧者進德脩業正所以行此事也

或躍在淵自試也

自試自審也上下進退之宜存乎一心非他人所能與者故自試之也

飛龍在天上治也

上治猶云盛治三皇以道五帝以德三王以功皆治之上者也

下此則伯而已

亢龍有悔窮之災也

時既窮矣而不知所以善處其窮則必至于有災

乾元用九天下治也

不徒日用九而曰乾元用九者元天之心也用九天之道也聖人
體天之心用天之道雲行雨施而天下平矣

潛龍勿用陽氣潛藏

當初之時陽氣潛藏在天地則爲閉塞之會在吾人則爲隱遯
之時也

見龍在田天下文明

九二有聖人之德而又居輔弼之位則上以佐天子之明命下

易經可讀 卷之一
以宣一代之人文四方昭格一代維新其化之所及者不亦溥乎

以言行化物故曰文明

終日乾乾與時偕行

天時不息君子乾乾亦與時相爲不息

或躍在淵乾道乃革

下卦終而上卦始乾道改革之際乃所遭非常之時也安得不慎

飛龍在天乃位乎天德

必有天德而後可以居天位九五德爲聖人則其位天位也乃位之以天德也非徒擁虛器而已也

亢龍有悔與時偕極

時之既極則當變而通之如與之偕極宜其有悔也

乾元用九乃見天則

天无則以无首爲則用九之道與天則合矣

何謂天則卽見辟龍无首者也以其剛健也謂之天德以其變化也謂之天時以其萬古不易也謂之天則一也復曰復其見天地之心乎惟一念獨覺者爲能見天之心惟自強不息者爲能見天之則

乾元者始而亨者也○利貞者性情也○乾始能以美利利天下不言所利大矣哉○大哉乾乎剛健中正純粹精也○六爻發揮旁通情也○時乘六龍以御天也雲行雨施天下平也

乾元者大也始也始者上天生物之心而人得之以爲始也謂之始其端甚嚴而如火始燃如泉始達未有不自微而顯者故曰始而亨者也人見其始而亨不見其亨之始蓋亨之始有利貞焉利貞者性情之謂也一理渾全化機隨之以具是利貞者雖主于收藏而寔爲發動之根抵也夫乾元固萬物之所資始孰知此利貞乃乾元之所資始乎故又曰乾之始夫惟其有此乾始而後能以美利利天下使天下受其利而莫能言其利揔之性情之運自然爾然耳此其爲利不亦大矣哉而就知卽此利貞者爲之也故又贊之曰大哉乾乎剛矣健矣中矣正矣純矣粹矣精矣雖欲極其形容有不能擬諸形容者卽乾之利貞也性情也蓋情而性則爲剛健中正純粹精之美德而不可見性

而情則此一卦之六爻曲暢而旁通之亦已發揮无餘蘊矣既有六龍而時乘之以御天吾知天且弗違矣既乘六龍則自然雲行雨施而天下平矣有不能以美利利天下者乎天下平則元亨利貞之四德又不在天不在易而在聖人矣

此章重利貞上大哉剛健中正純粹精之贊所以贊此也六爻之旁通所以通此也雲行雨施而天下平使天下各得其性情卽聖人之利貞矣○始而亨者一始使通御遇不住也蓋出乎震則必齊乎巽相見乎離此必然之勢也若不亨通則生意或幾乎息矣性者百物具足之理情卽性中所含之情性屬王事情屬稅絨性不可見情畧發動而可見故下文曰旁通情也始亨性情俱且以物言而造化之始亨性情自

見蓋始亨之時性情方動至此則性成其爲性而渾然完具
情成其爲情而隨處充滿矣乾始言此利貞乃乾之始也卽
貞下起元之謂乾始者元也美利利天下不言所利卽亨利
貞也不言所利至德微妙不可窺見不可形容卽具有純粹
精之意故贊曰大哉乾元剛健不足以中正贊之中正不足
又以純粹精贊之至于精則極微極妙不可名狀此性也乾
之所以爲乾而元得之以爲元者也此乾道之蘊也性不可
見而情略可見故以六爻發揮之情主于動而六爻亦主于
動動无定形而本之于時時无定在而本之于理安往而不
旁通也哉發揮如作文旁通是闡明題旨情卽乾道之流行
也聖人之德其爲剛健中正純粹精者不可見所可見亦惟

時乘六龍御天而雲行雨施使天下咸得其平而已天下平者以乾之情而通乎天下之情天下自平也天下平是利貞景象而元亨已包在內非卽聖人之元亨利貞乎○剛以体言不屈也健以性言不撓也中者无過不及也正者不偏也純者純而无襍也粹者不襍之至而良美也精者又不襍良美之極至也此亦逐解字義而要之所謂純粹精者非出乎剛健中正之外也

君子以成德爲行日可見之行也潛之爲言也隱而未見行而未成是以君子弗用也

成德者已成之德卽龍德也君子以此成德爲行奚待積久拍日可見之行事矣然潛之爲言也其時尚隱而未見雖欲行而

未成是以君子弗輕用也

德者行之本行者德之用蓋有有其德而不見諸行者未有
有其行而不本諸德者行之未成猶言行不成耳乃時位阨
之也玩未成字可見君子体用合一之學非徒石隱而已

君子學以聚之問以辨之寬以居之仁以行之易曰見龍在田
利見大人君德也

天下之理靡學弗聚是故君子旁搜汎覽自載籍之博以至于
事爲之隨罔有或遺无非以求會聚此理于心耳然此理雖聚
蓄于我或有知其所當然而未得其所以然或古今異時彼此
異勢以及是非疑似之間而未得其至當歸一之極則又問以
辨之焉問者上問于師下及于友也揔之講究辨論云耳夫旣

收之博而擇之精設或以躁心乘之亦何益哉故又必從容涵
泳優游不迫庶理之存于心者有浹洽渾融之妙也由是履諸
身而措諸事其必內而无私外而當理一惟天理當然之極而
无一毫私欲之累則是仁以行之而君子之學庶乎有全功矣
若此者非大人之德不足以當之故曰見龍在田利見大人君
德也言其德宜在高位而澤及于物者溥也

之者理也聚者理散于外必學以聚之也問辨者辨所聚也
寬居者居所辨也仁行者行所居也節節相因到仁行是純
熟地位无工夫○問仁行何必寬居蓋學聚問辨尚屬口耳
一邊使其涵養未純粗心浮氣卽欲見之踐履則居之不安
資之不深安能左右逢源而大公以順應哉故寬以居之之

不可少也仁行者恰好无私欲之累耳

九三重剛而不中上不在天下不在田故乾乾因其時而惕雖危无咎矣

九三重剛是性体之極其陽明者而所處之地不中蓋上不在天如飛龍之乘御下不在田如見龍之游衍其時其位有非可以旦夕盜也所可行者人事之進修耳故乾乾因其時而惕雖危而无咎矣

九三九四皆曰重剛以上下皆乾三四適當兩乾交接之處故曰不中照九四中不在人看來三之進修正當盡其在人者耳

九四重剛而不中上不在天下不在田中不在人故或之或之

者疑之也故无咎

九四重剛不中正當乾道乃革之際上不在天下不在田且中不在人則進修之事亦已盡而无可爲者但欲其及時耳故或之或之者疑其可以上可以進而不敢輕遽爲之也此政其所自試也

夫大人者與天地合其德與日月合其明與四時合其序與鬼神合其吉凶先天而天弗違後天而奉天時天且弗違而況于人乎況于鬼神乎

大人者以道爲体道无私也故天无私覆地无私載日月无私照四時之序无私闔闢鬼神无私吉凶皆道也大人一无私則道在我質之天地而合質之日月而合質之四時鬼神無往而

不合矣故或天地間有未嘗顯設之道理大人開先而創造之是爲先天然天本有是理而大人不過洩其秘耳天何違于大人天地間有已然昭著之道理大人欽若而率循之是爲後天然天已有是理而大人不過奉行之耳大人豈違天哉夫天且弗違如此況于人者天之所生也又況于鬼神者天之所使也其得而違之乎天下信之鬼神依之固理之必然者尚何疑于利見之說乎

或問大人如何與天地合德蓋天地者无一物不在覆載生成之中大人者盡天下古今萬世民物无有不賴其覆庇資其生成者也故合德日月之明滿天地間曾有一物一屬不被其照臨者乎大人者盡天下四海九州千古萬世民情物

故无一不在其照灼之下故曰與日月合其明四時當春而生至夏而長秋收冬藏各順其氣各依其候一自然而然之次第大人剛柔仁義以順而施弛張操縱因時而布各適其宜各當其可自然而然之次第卽四時之錯行也鬼神者盈而害之謙而福之積善而慶之積不善而殃之其爲吉凶至公无私者也大人因人之善而好之因人之惡而惡之刑賞威福至公无私與鬼神之福善禍淫何異○又問天所未爲已爲何以驗之曰天畢竟无爲也大人者口代天言手代天工大人所爲卽天也天所未爲乃上古前代未有作者大人方始爲之卽是先天但見其思之也天卽爲之啓其衷焉其得之于心而見之于規制也天卽爲之相其成焉是之謂天

不違也天所已爲乃前此已有作者大人從而稽述之是謂
後天但見其歷歷代而斟酌者皆因風會之所趨而不敢強
也秦群制而損益者一本世運之所宜而不敢拂也是之謂
奉天時天不違固見天之從也奉天時亦見天與之應也天
且不違而況于人乎言而世爲天下法行而世爲天下則達
之則有望近之則不厭也況于鬼神乎如風雲雷雨社稷山
川皆鬼神之所在而皆阿護翊戴之也然德是要狀他橫行
直撞與天爲一故分个先後形容之一是嘿契一是奉行大
人渾身是天理耳○又曰大人身通天地之先而用必後天
事起天地之後而智必先天先天者後天之體後天者先天
之用也先天後天二則不是惟見天則者能一之

亢之爲言也知進而不知退知存而不知亡知得而不知喪○其唯聖人乎知進退存亡而不失其正者其唯聖人乎

亢之爲言也身有進退徒知進而不知有退位有存亡徒知存而不知有亡物有得喪徒知得而不知有喪則昧乎理勢之必然而失其所以處之之道矣彼固與時俱亢所以動而有悔也求其善處亢之道而无悔者其惟聖人乎蓋進極必退存極必亡理勢之自然也聖人知其如是而處之以道非先時而警戒則隨時而變通要歸于不失其正而已若此者非庸衆人之所能與也惟聖人之德誠精而明明則有以燭之道圓而神神則有以運之而已時有亢而聖人无亢无亢又何悔之有

知進知退聖人胸中原无進退也知存知亡聖人胸中原无

存亡也不失其正歸于不失夫道之正而已貞者正也乾元
之用所歸宿也乾之四德始于元而成于貞故聖人之體乾
必歸于正蓋四德以貞爲智上九而妙此德必不至于窮此
夫子所慘慘致之意也

三三三坤元亨利牝馬之貞君子有攸往先迷後得主利西南得
朋東北喪朋安貞吉

一者偶也陰之數也坤者順也陰之性也此卦六畫皆偶上下
皆坤則陰之純而順之至也故坤之名地之象不易焉文王係
詞以爲坤天下之至順也人惟恐其不順耳至順則能虛心而
順應付物以无違此其于天下也何施而不可亦當得大通焉
然坤何以順順于從陽之謂也故必謙恭巽志以統于尊性命

是從而无敢拂逆斯爲利牝馬之貞矣乾爲馬而牝馬則乾之配也乃取象焉夫君子而有所往當何如耶蓋坤陰也乾陽也以大分言則陽主乎先也義也而其方則東北也陰主乎後也利也而其方則西南也此則陰陽之大較耳故自其主宰綱維而知大始者謂之先自其隨倡而和无成有終者謂之後自其作威作福裁制自我者謂之義自其行所无事聽其自然者謂之利自其慎乃服命守分安常者謂之西南方自其越乃取守恃才逞力者謂之東北方故爲坤之君子若居先也則迷造端弗審庸克達乎惟居後而退聽斯有得而无失也无必循其自然不煩造作而以利爲本焉故在西南則分以内也自有同類之朋協恭而共濟在東北則分以外也人見其僥倖之舉皆離

心而離德矣復安得有朋是故後而无敢先也利而无敢斷也
往西南而不往東北也此之謂牝馬之貞也惟安于所貞而始
終如一矯拂不形斯得坤道之善而吉隨之矣吉者即大亨之
謂也

坤元亨與乾元亨不同乾无所不元亨坤只是柔順者元亨
也此陽全陰半之理以人而論則敬人者人恒敬之愛人者
人恒愛之慈惠純良而不拂人之性自然在彼无惡在此无
咎故謂之元亨也元亨緊承順字來順者陰之性也純陰順
之至也然此順何居必從于陽乃謂之順如臣子之從君父
妻妾之從夫主始謂之順也乾爲馬坤爲牛牝馬配乎牡者
也北地馬群每十牝隨一牡而行不從他群坤之貞全在從

乾故曰利牝馬之貞君子有攸往一句揔起下文先後不可以事之首末言只任已先物則致迷居後從陽則不失也迷與得猶言是與不是耳主利只是足後得之意本義云先迷後得而主于利玩一而字可知利順也卽故者以利爲本之利與裁制之義相反彖傳曰後順得常順卽利也文言曰後得主而有常主者卽此主利之主可見主利非後得之外別爲一事也西南東北初非指天下之西南與東北方也文王後天卦圖坤位在于西南此曰西南者取其爲坤本位以象人臣本等服命本然位分也往西南者卽所謂慎乃服命率吾典常无敢踰越如文王以服事殷但自享于岐山无敢妄升之類是也是故同類之朋咸與同心合德以事一人協恭

共濟膠漆不足喻其堅矣東北云者後天卦圖乃艮剛居之非坤陰本位也若從東北則是強梁跋扈方命負固如魯三家晉三卿齊田常之類是也人心誰則與之強者怒于言弱者怒于色舉國皆仇敵矣安得有朋先迷後得主利者明乎臣子大義毋敢專制也西南得朋東北喪朋者安乎臣子大分毋敢踰越也合之揲是順于君父蓋坤之道本如是也安貞吉者應上文而結之猶言當心安意肯于此不可有一毫勉強而或變遷也

彖曰至哉坤元萬物資生乃順承天○坤厚載物德合无疆含弘光大品物咸亨○牝馬地類行地无疆柔順利貞君子攸行○先迷失道後順得常西南得朋乃與類行東北喪朋乃終有

慶○安貞之吉應地无疆

此以地道明坤義而隨以君子配之蓋乾元與坤元非二氣其辨只在先後之間乾元大矣坤元亦爲至極而无以復加也是故萬物之有始者不知其幾而皆資之以有生焉非坤元則不成物矣然初非自用也乃順承乎乾之氣以生之而要于成就若臣子之奉行君命无成有終者然是坤元之所爲至也而其德可易言乎哉坤之德厚載物原與乾德之无疆合故就其德之包含見藏用之弘而由此德之光顯見效法之大品物至此鬯茂條達有不止流形而已者此坤之亨也然曷以利牝馬之貞哉牝馬地之類也順也行地又无疆焉順之至也以是知坤德之柔順承天而載物與牝馬之順同而坤德之順承厚載與

天而同其无彊者與牝馬之行地无彊同此占坤者必利牝馬之貞也而君子攸行可異是乎哉曰先迷者失坤之道也曰後得主利者得坤之常也西南得朋其類從之東北喪朋乃反之西南則終有慶矣是可見坤貞之不可失也君子患不安貞耳誠安于此貞而不渝焉則吉隨之謂其應地之无彊而得坤道之純也地之柔順必合乎乾之无彊則地道之所以常寧君子之柔順必合乎地之无彊則人道之所以常泰此牝馬之貞所以爲利與

至自坤分內言亦到那至極處也大哉至哉何以別大以統天而爲言至以順承天而爲言大哉堯之爲君也巍巍乎惟天爲大惟堯則之此便是大哉之乾文王三分天下有其二

以服事殷周之德其可謂至德也已矣此便是至哉之坤○乾元坤元以一氣初出之先後言資始者有其始耳資生者從此成象之始生生而不窮也順承天照前統天者其順承亦直貫到底與統天一般言順承其所統貫者一一奉行之也○坤厚載物二句不專在亨邊說坤之德只是一個厚厚故能載物而德合于无彊所以資生而順承者在是所以含弘光大者在是此二句綴乃順承天之下含弘光大之上也然以其含弘光大萬物隨之而亨却見坤之亨○坤厚非指體質言也卽其上文坤元發動至此而盎然充裕磅礴滿盈謂之厚也載物非但以形体附麗言蓋卽上文資元以生之物日生生于其中謂之載物也德合无彊者蓋乾始則亨一氣

流行布滿既盡天下萬物而不冒之坤復而通一氣絪縕
滿亦盡天下萬物而不承之是坤之德有以妙合其无疆而
陽施陰受寔爲相須以共成造化者也含弘者含而容之日
爲之涵濡養育弘則无所不含之謂蓋所以滋萬物之息者
其氣无所不至也光大者宣而絜之日爲之昭晰發越大則
光之達蓋所以顯萬物之出者其機无所不達也此四字總
是坤亨時節品物咸亨物隨坤而亨也洪者纖者高者下者
各以其類各形其形舒暢條達无少鬱滯矣○或問光大亨
也咸弘何以見其亨曰此正亨時事也蓋物氣既萌物形甫
肇政有賴于地氣含而育之乃日長盛凡人物初生未有不
賴其母之含育者故坤之亨必以含弘言也○坤之厚原合

于无彊則順承天施有萬古如一日故以牝馬地類一句發
明柔順利貞以示君子之當行蓋以象言則爲牝馬地類以
義言則爲柔順利貞然講解却在牝馬句而下句緊承云此
所謂柔順利貞也○常卽道也坤道只是个順順便是其常
也故曰先迷失道後順得常順卽是主利利字後矣而又順
乃得坤之常道故曰後順得常○朋者類也陰性不能獨立
利在得朋故曰西南得朋乃與類行東北喪朋乃終有慶終
克終也物極必反之意言其易危爲安轉喪爲得而有慶也
○安貞之吉應地无彊蓋柔順利貞地之安于貞也君子攸
行以下君子之安于貞也地安于貞故與乾行不息者同而
德合无彊君子安于貞故與坤順有常者同而應地无彊則

所謂資生順承厚載咸亨者皆在君子之一身故曰安貞之吉此安寧卽不習无不利之意○牝馬地類行地无疆是以牝馬之不息者明地之无疆坤厚載物德合无疆是以坤順之有常者合天之无疆安貞之吉應地无疆是以君子之体順者配地之无疆揔之一无疆也

象曰地勢坤君子以厚德載物

上下皆坤則是地之爲勢一高一下相因无窮于物无不載之象君子一身負荷斯世匪厚德孰能勝之内主慈良外施愷弟舉一世甄陶而无外矣非卽地之厚以載物與

天以氣運故曰行地以形載故曰勢厚德載物者以深厚之德容載乎庶物也

初六履霜堅冰至

初六一陰始生其端甚微而其勢必盛有世道之責者履斯際也若履霜焉則知堅冰之將至不可不防微杜漸思爲善後之策慎勿使其滋蔓而難圖也

象曰履霜堅冰陰始凝也馴致其道至堅冰也

坤之初履霜且惕以堅冰危之蓋初六一陰始生乃凝而爲霜也陰之始凝雖微乎而馴致其道必至于堅冰矣是他日之冰自履霜始也可畏哉

本文只以象言而小人必盛之勢自見于言外○始凝全在消釋不消釋上而馴致之令不可推擊則養成之過也馴者順習而長成之道也道卽小人道長之道上六其道窮也本此

蓋事勢之來不知不覺因循積漸以至於此故曰其所出來者漸矣

六二直方大不習无不利

柔順正固坤之直也賦形有定坤之方也德合无彊坤之大也六二柔順中正得坤道之純者故就其德言之直矣而无枉焉方矣而无邪焉且其所爲直方者大矣而无外焉殆若天植其性不待學習而自无不利者所謂純德之君子蓋如此

直方分内外大卽在直方上見人之生也直其本性也直則施爲無錯皆无不和直方則大不習无不和矣此是一串語

○直者在內念慮不失其柔順中正也方者在外事爲不失其柔順中正也大者念念皆柔順中正事事皆柔順中正也

○在本文則爲柔順中正在諸爻則爲得坤道之純究其所爲得坤道之純亦只是柔順中正而已○不待學習而自无不利取之左右逢其源坦然由之而无疑也言其直者自直方者自方大者自大皆不待思勉而自中道也

象曰六二之動直以方也不習无不利地道光也

六二之動見以爲方矣此方何由由由于直也由本体之直見化裁之方不習而无不利矣地道之光曷以加焉

君子之德全于動處可驗六二之動由直以爲方則内外合一而時措之皆宜是其大也不習无不利也地道之含弘光大亦不過是故曰地道光也○六二君子之德曷以地道言安貞之吉應地无疆地勢坤君子以厚德載物君子之道即

地道也光文采也熟則光生則濫此常理也惟思爲不擾而性体獨呈自然光輝發越矣

六三含章可貞或從王事无成有終

三居下之上有位者也以陰居陽有才美者也人臣之道善則歸君以含晦其章美爲正乃可常久而不失卽或從王之事亦不敢當其成功惟奉戢以有終而已

露才揚己最是薄德二含章美厚德士也含章卽是貞貞卽其可守者故曰可貞或者設言也成專成也終代終也卽或從王之事无敢專成惟是代之有終此正含章可貞○人臣非无才智之患而才智太過之患夫才智太過者上未免于偏主下必至于凌人渾厚朴實之意已斲喪而无餘天下國

家之事未免漫爲而嘗試如之何其可以爲自乎惟其有章而舍之无智名无勇功恂恂乎其不能言斷斷乎其无他技臣道之正也无成有終畢竟含章君倡而臣和君先而臣後臣之章皆君之章也臣何功之有焉

象曰含章可貞以時發也或從王事知光大也

三知含章耳可貞耳而具此盛美自然以時而發越則其或從王事无成有終者真乃識超尋常萬萬矣故曰智光大也

光謂見得明大謂見得大人臣之道只是个无成有終三知此道其識見超廓自非凡庸所及所以爲光大故凡人臣而爭功能者皆闕于道者也○或從王事卽該无成有終在內

六四括囊无咎无譽

臣之道有不可不楊翊于外者有不可不韜晦于內者六四重陰正當韜晦之時豈可自露其猷爲哉必慎密若括囊庶幾乎免于咎矣若是而亦何譽焉

陰虛能受囊之象也括者結囊口而不出也出乎咎必入乎譽人情所不能免也四之意重在括囊以免咎而无譽非所計耳然无咎固難而无譽尤難必譽之絕始能咎之免也

象曰括囊无咎慎不害也

臣道以慎爲要六四韜晦若括囊然豈與世之肆爲无忌者同乎哉所以不害也

括囊者慎也无咎者不害也

六五黃裳元吉

君道貴中也六五秉中德以居尊惟是敬共賢士体悉下情而不敢自處于驕亢若黃之中色用以爲裳者然如是而操履之謙抑理道之優柔將必有媲美溫恭之軌而事成乎和平之盛治者故爲大善之吉

黃中色裳下飾六五以陰居尊中順之德充諸內而見乎外此統訓也中順二字須認明五只是个中而帶順以爲言者坤体本順五有中德故合而言之耳非以中貼黃以順貼裳也若曰五有此中順之德必不自恃其尊貴而謙沖以爲理云耳要之中順非有二項道理順乃中的順卽其順皆中道也而所謂中者又卽順之純粹而精美者耳蓋其天然中節之和

呈爲一身之章溢爲庶政之文自修已尊賢以至柔遠人懷
諸侯莫非溫溫克讓之體穆穆徽懿之德真若禹之無間文
王之純亦不已故其象曰黃裳裳有文采意黃色中自然成
文章也○乾九五初業之君坤六五繼體之主

象曰黃裳元吉文在中也

黃裳元吉文治也豈由襲取哉中德寔具于內積之也深養之
也盛是以微猷謙懿之美自發越于外而不可掩耳

文卽中德中具于內曰黃中中見于外曰黃裳

上六龍戰于野其血玄黃

陰盛之極陽所不堪乃與之戰于野野戰非常度也以言陰勢
泛溢无復限制也斯時也陽之所損者必多然陰亦豈能兇哉

吾見陰之傷也卽其无上之心若以爲其色玄而寔則小人之
雄矣非黃而何故曰其血玄黃然則爲陰者何利焉可以自傲
矣

龍戰者陽禦陰也血者陰傷也玄黃者欲混于陽而終不能
混也黃是本等色分玄則明其僭亂之意

象曰龍戰于野其道窮也

陰盛之極其道已窮必爲僭亂此龍之所以不容已于戰也

用六利永貞

用六者知龍戰之不經也吾惟一于從陽而不變焉寔受其福
何利如之

觀龍戰之傷則知永貞之利矣貞正也陰以從陽爲正也利

永貞卽利牝馬之貞也

象曰用六永貞以大終也

天地間之理未有正而不大者用六則始終皆一于正不惟以大始而且以大終也

乾以大始坤以大終不失順承之義矣此大字亦從乾上來
文言曰坤至柔而動也剛至靜而德方○後得主而有常○含
萬物而化光○坤道其順乎承天而時行

文言申明地道之順意曰坤地道也退然不敢以專主至柔也
而承乾而動氣至卽發勃然其不可禦焉何動之剛也寂然不
見其作爲至靜也而承乾之施賦形有定確然其不可易焉何
德之方也卽其柔而且靜其所爲後得主利而有常乎而包含

萬象由此化極其光顯是則所謂動之剛德之方也卽是以觀
坤道其順乎效法作成其功雖與天相配而无成有終寔惟承
天而時行焉耳吾謂乃順承天柔順利貞蓋如此君子者不法
其所謂順可乎哉

此章不必分解元亨利貞但極其形容坤道之順耳順者何
乾倡坤和陽施陰受盡之矣倡而後和施而後受分也分之
所安便柔而靜倡而必和施而必受功也功之所成便剛而
方柔則无爲剛則无不爲矣然柔中之剛爲而寔无爲也靜
則无形方則有定形矣然靜中之方形而寔无形也此所以
不徒曰貞而曰牝馬之貞也後得王利卽牝馬之貞也柔卽
後也靜卽利也故曰後得王利而有常言得其常道也含萬

物而化光承動剛德方上來言盡天下萬物莫不有以包而含之爲之涵育其根本培養其生意而其化日以光顯微者著者者盛也上文動剛德方只言其當生必生其生有常耳含萬物而化光則極言其生物之盛也○夫其後得主利也順也其含萬物而化光也亦順也合而言之坤道其順乎承天而時行健順者天地之大分也時者天地之大機也承天時行則是乾之氣未動坤不敢先惟乾氣一動而流行貫徹于始亨遂成之間坤卽順之隨其貫徹流行所至二奉而行之者焉坤道之順何如也蓋先天有爲非順也後天不爲亦非順也惟其无爲而无不爲此之謂順此之謂坤道○或問動剛德方何以別曰動剛就无專成中能效用者言德方就

无作爲中有定則者言德方稍在動剛之後大傳曰效法之
謂坤能效是動剛效法是德方聖人之言之妙如此○後得
王利彖看人說此何以地言曰此正理之合一者无感而代
有終地道也言人道亦可言地道亦可○或問含弘光大品
物咸亨是亨此欲驗其所謂動剛德方者何也曰坤元見之
于資生坤亨見之于光大利貞者卽此資生光大者成其終
耳此曰含萬物則資生光大俱未著而化光則正見其所謂
資生光大者而成其終也非動之剛所含之萬物何爲而化
光非德之方所含之萬物不幾于參錯而不齊哉此所謂後
得主而有常正其所謂柔順處而含萬物而化光可驗其所謂
動剛而德方也且前云含弘光大品物咸亨此但云含萬物

而化光不及咸亨則前之資生後之利貞統具備于化光二字矣○卦詞先迷後得主利以下凡數語彖傳一一明釋之不見其爲煩此只就後順得常四字翻作後得主而有常一句先迷後得主利西南得朋東北喪朋安貞之意悉具其中不見爲略真是聖人之文

積善之家必有余慶積不善之家必有余殃臣弑其君子弑其父非一朝一夕之故其所由來者漸矣由辨之不早辨也易曰履霜堅冰至蓋言順也

善之召慶不善之召殃理之可必者也而積善之家之必有余慶積不善之家之必有余殃尤其理之可必者也若曰臣弑君子弑父豈一旦能致此變哉養之有漸而不覺也臣子一念之

之不善使君父辨之早而折其萌奚以至此及其惡已成而後辨則何及矣易曰履霜堅冰至至言其辨之不早而順習之以至斯極也有世道之責者尚早辨之哉

由辨之不早辨極喫緊上辨字以今日言下辨字以前日言積由于漸漸由于不知辨則長成而順習之矣此順字卽馴致其道馴字蓋謂之漸則其幾微之間有先見而人莫之覺者乃禍福之所由分而辨之不可不早也此因一陰始生而在不善上講

直其正也方其義也君子敬以直內義以方外敬義立而德不孤直方大不習无不利則不疑其所行也

直者何也此心本体之正固如是也方者何也此心裁制之宜

固如是也。此六二直方之所由名也。君子當何如。敬者一心之主宰也。不敬何以能直。必其存諸心者。戒慎恐懼。而无一毫怠肆之失。則天理常存。不期直而自直矣。義者。禹事之權衡也。匪義何以能方。必其措諸事者。當理合宜。而无一毫偏倚之累。則物來順應。不期方而自方矣。敬義既立。而德何患孤乎。蓋敬之至者。外必方。外不方。不足謂之敬。不足謂敬是德之孤也。義之至者。內必直。內不直。不足謂之義。不足謂義是德之孤也。今既有敬以涵義之體。又有義以達敬之用。則內外夾持。表裏如一。日用之間。莫非天理之流行。德自充。滿盛大而不孤矣。何大如之內。而念念皆天理。則內不疑。外而事事皆天理。則外不疑。內外坦然而無疑。則暢于四支。不言而喻。發于事業。隨處而當。何利。

如之此所以不習无不利也

直其正方其義直指本体无工夫工夫全在敬義敬義俱是精神豎立處敬是自家精神主持得定義是自家精神處置得宜敬之精明條理處卽爲義外義之敬非敬也義之整齊嚴肅處卽爲敬外敬之義非義也古之聖賢雖如尸如齋而物情民故无一不了了于胸中雖萬感萬應而一念性靈未嘗馳逐于外良以敬義之並立耳若曰正以直内則无頭緒之可言矣○不孤卽是大則不疑其所行也則字甚緊切此是直說其行之无不利處所行甚麼行其所立者也敬義立而不孤便見之行事矣疑滯礙也欲直則未能直欲方則未能方心欲而力未能赴之是滯礙也工夫未純熟故也不疑

是不勉而中○小人惟多愧也故居則畏動則疑君子心惟主敬也故內直推其直于物故外方直在其內方在其外隱然如名師良友之在吾側也是以獨立而不孤夫何疑之有陰雖有美含之以從王事弗敢成也地道也妻道也臣道也地道无成而代有終也

陰雖有才美而含之不露可以時發而從王事矣或從王事不敢有其成者非其才有所不足不能成也乃其分之不敢成也何也法象莫大乎天地三綱莫大乎夫妻君臣天統乎地夫統乎妻君統乎臣皆尊者倡而卑者和之故地道也妻道也臣道也皆不敢先自主也一如地之无成惟代天之終耳盖天能始物不能終物地繼其後而終之則地之所以有終者終天所未

也地不敢專主其成而且有其終故曰无成而代有終也六三爲臣乃當如此

道本來道理當如是也成者成其始而無乎終也終者无其始而僅終其事也

天地變化草木蕃天地閉賢人隱易曰括囊无咎无譽至聖謹也

六四之括囊何也天地變化世道開明則草木之无知者且然蕃茂况人乎賢人亦无樂于隱矣若天地閉塞而不通則賢人必歛德以避難此其所以隱也坤本陰卦六四重陰又不中則陰之極矣正天地鬱塞有陰无陽不能變化之時也故當謹守不出者以此

天地變化非春夏發生之謂也。天地閉非秋冬肅殺之謂也。此天地變化卽董仲舒所謂聖人在上陰陽調風雨時者也。蓋陰陽之氣或極脩或極无皆滯于一偏不可言變化也。惟二氣流通庶徵各以其時而至。是天地變化之時是故百穀用成庶草蕃蕪。又用明俊民用章矣。天地閉者董仲舒所謂政多紕繆則陰陽不調之謂也。蓋或恒于陽而不交于陰或恒于陰而不交于陽二氣閉塞庶徵隔絕是故百穀用不成又用昏不明俊民用微矣。蓋言謹也。謂爻詞之所云者正謂其天地閉之時當謹密自守而不出也。

君子黃中通理○正位居體○美在其中而暢於四肢發於事業美之至也

六五曰黃裳元吉黃者中也君子一中具于其內則盡天下之義理何所不貫而盡義理之精微何所不哲蓋通而且理者故知尊位非所恃也位雖正于王公億兆之上而居執下体心常在于王公億兆之下斯六五之所謂黃裳也而其美可易言哉美在其中極通理之妙而暢于四肢發于事業莫非一中之發越而驕亢之不形誠美之極至而无以加者元吉之治其以此也夫

黃者中德也中者內也黃中者中德之在內也通者豁然脈絡之貫通无一毫私欲之滯塞也理者井然文章之條理无一毫私欲之混淆也通理卽是黃中處蓋黃中非通則无以應乎外通而非理則所以應乎外者不能皆得其當此所以

言黃中而必以通理言也。正位五尊位也。体者乾坤之定体也。乾陽乃上体，坤陰乃下体。言五雖在尊位而居下体，此二句統釋黃裳之義，而下文復贊美之，以見元吉之意。美即黃字，中即內字，暢四肢發事業，即其仕中之美所暢也。○此段本義无中順字而正位居体，緊根黃中通理來，言有此中德則其正位自不居于驕亢而居于下体也。美在其中，節又緊承上二句來，言中德具于內而暢于四肢，發于事業者，莫非是物，則其美誠極至而无以加矣。此是一氣語。俗解上分中順而下合言之，非也。○一說坤无君位，五乃陰之正位，與乾之九五相對，故曰正位居体，即乾乃位乎天德之位也。證五以陰居陽，故曰美在其中，暢明內蘊，陰体虛含，自中自正，自

卑自恭自有四肢允暢之容理之通者動夫四体也理不中
通神不擇体四肢皆形骸之體不爲吾用矣通暢發揮雖在
坤而寔本之乾故美與三同而中德爲尤盛也三爲坤之全
体猶在下卦之上故雖美而含之焉耳若五則暢而發揮之
矣故曰美之至○六五當與六二並看故皆以君子言蓋直
內方外之君子卽黃中通理之君子也君子敬義夾持涵養
熟矣操存固矣胸中洞然事理渾一更无疑滯謂之黃中通
理正位居体居此体也非正五之位將何居焉六二直內方
外兩致其力至五之黃中通理則內外通貫无所容其力矣
○潘子醇曰智慮外通所見者在彼故知人者智黃中中通
所觀者自性故自知者明所見者在彼体亦從而與之旁行

所觀者自性体亦從而居于正位正位者自乾坤未成列而所謂真君者居焉獨于坤五明之者坤歸藏者也正位居体如龍蛇之蟄而五尤冲氣爲精神之全中正之至者也故五行之上五色之黃五聲之宮五味之甘所以各尊于其類者皆此理耳黃中通理以徹其原聖人所以造上達也正位居体以止其所聖人所以未始出吾宗也按此說居体二字極細本于東坡

陰疑于陽必戰爲其嫌於无陽也故稱龍焉猶未離其類也故稱血焉夫玄黃者天地之雜也天玄而地黃

陰至上六幾不復有陽矣然陽雖甚微名分猶存不容泯也當其時人誰知有上六而已豈復知有陽哉聖人惡其无陽也故

特稍能以見其猶有龍在人心終不忍忘不可侮也血陰物也
稱血者何以明上六雖不安乎臣類而豈得遽離之未離乎類
則當戰之時陰陽俱傷不獨陽傷也夫玄黃者特陰陽混雜時
耳若天地之正色上玄下黃判然而不可易者也噫聖人言此
其扶世道正人心之念亦深切矣哉

疑者疑似均敵无小大之差也蓋言陰盛之極其勢將相凌
逼不能以相承如小人之于君子亂臣賊子之于君父夷狄
之于中國日事僭擬日行侵犯此豈容坐受其攻而不爲之
禦耶理必戰之故其詞曰戰也○或問陰陽均敵則是陰盛
而陽亦盛也何以謂陽衰耶曰陽統夫陰陰制于陽者也苟
非陽衰陰豈能均敵之耶故知陰之均敵乎陽陽衰也扶陽

易經口義
卷之十
無別法只是抑陰勿令縱肆而已抑陰政以扶陽也○天者
陽始于東北故色玄地者陰始于西南故色黃

三三屯元亨利貞勿用有攸往利建侯

此卦上坎下震乾坤始交而遇險陷故其名爲屯蓋造化之氣
鬱而未泄則在物爲勾萌之未舒在世爲多難之未泰恒相因
也夫屯難之世天之所以開聖人也將終焉而已乎况險中能
動是有撥亂興衰之才者故不終于難而當得元亨然必正焉
而後可以亨惟至正爲能正天下之不正也必不輕于所往而
後可以亨惟不欲速爲能成功之速也然大難方殷无主則亂
故當立君以統治之初九陽在陰下而爲成卦之主是能以賢
下人得民而可君者又必從人心之所屬望立之爲主斯利矣
動夫險中未是便出險但險中能動便是有可出之機故以
大亨屬望之利貞宜于正也以德服人以仁義收天下心是

也有攸往愆于往也蓋志遂于功利務爲僥倖以齒進取苟得者也卽利貞之反也此是足上句反復丁寧之耳初九陽剛一索而得震者故曰成卦之主

彖曰屯剛柔始交而難生○動乎險中大亨貞○雷雨之動滿盈天造草昧宜建侯而不寧

乾坤之後一索得震而始交再索得坎爲難生合震坎之體而爲屯也又其義爲動夫險中能動是其才足以有爲故得大亨在險中則其時猶未易爲故利貞震爲雷坎爲雨皆陰陽始交之所爲雷雨交作在在滿盈萬物萌生屯而未達之象天地造始之時也造始之時草昧蒙襍衆无定主初九以陽居下辟陰之所歸者宜建之以爲侯然更當悉心經理未可遽爲安寧也

斯則濟屯者所宜知哉

始爻者震以一陽交于二陰也坎爲難以一陽陷于二陰也
震爲動坎爲險以卦德言卽義也上坎下震故曰動夫險中
動者奮發勇往之意本有才講大亨貞者大亨而利于正是
一氣語勿用攸往意卽在內不須提矣雷雨以卦象言滿盈
盈滿于兩間也卦中只是雷雨之動滿盈却從此看出天造
草昧來非以天造草昧卽雷雨滿盈也草者如草之不齊昧
者如天之未明分貼襍亂晦冥四字天造天之所造作也天
造如此則天下未定名分未明宜立君以統治之然不可謂
建侯便寬心无事必須憂勤兢業不遑寧處方可撥亂反正
以成靖難之功如更始旣立日夜縱情于聲色則非不寧者

矣此聖人濟屯之深戒也○東坡曰屯有四陰屯之義也其二陰以无應爲屯其二陰以有應而不得相從爲屯故曰剛柔始交而難生物之生未有不待雷雨者然方其作也充滿潰亂使物不知其所從若將害之霽而後見其功也天之造物也豈物物而造之聖人之救民也豈人人而救之亦付之諸侯而已然以爲安而易之則不可

象曰雲雷屯君子以經綸

雲雷交作而未沛其澤屯難之象也屯難之時天下未定名分未明全賴君子之匡拯如何而定其所未定如何而明其所未明此經之謂也而卽其所定所明者又有條理節目之不同此綸之謂也君子以經綸則匡濟之畧畢舉而屯其可亨矣

彖言雷雨象言雲雷彖言其動象著其体也上坎爲雲故曰
雲雷屯下坎爲雨故曰雷雨解經綸治絲之事也草昧之時
天下政如亂絲經以引之綸以理之俾大綱正萬目舉正君
子撥亂有爲之時也○建侯者人也經綸心也國主于侯事
主于心故經綸從心上起

初九磐桓利居貞利建侯

初九陽居動体本足以有爲者但在屯難之初上應陰柔陰陷
之爻審時度勢未可以輕動有磐桓之象焉此貞也利于居此
貞而勿用有攸往可耳然其以陽下陰爲衆所歸則亦從民之
望建以爲侯非貪一己之富貴而期有濟于天下者何不利
之有

磐大石也桓大柱也俱難動者本義未可輕進義亦相通但與磐桓二字不貼○凡爻詞一氣說下初九有磐桓之象有居貞之意有侯之象曰磐桓利居貞建侯皆爻詞也若謂初九磐桓占者利居貞利建之爲侯則不成文理耳磐桓卽居貞卽勿用有攸往此亨屯第一義利建侯是亨屯第一事初陽在下爲成卦之主故特發之利建侯者利在民利居貞則利在已也

象曰雖磐桓志行正也以貴下賤大得民也

屯之時以經綸爲正初九雖磐桓不動而其志未嘗一日忘天下惟欲行之所以居之也其志誠欲行正則能以超群邁種之德而究心于安民利物之圖天下之人歸之故宜利建以爲侯

也豈无本哉

行與居對居者居所行也行者行所居也全重一志字貴賤以德言初九陽德可貴者也屈已安民民心歸之故能大得民耳以貴下賤繫頂上志字來

六二屯如遭如乘馬班如匪寇婚媾女子貞不字十年乃字濟屯以能進勝然亦頗所守何如耳六二陰柔中正有應于上而乘初剛則雖欲上達而无由者故詞擬屯遭象擬乘馬班如焉然初九之心寔是非爲寇而欲與之婚媾其情又甚難却者二誠守正而不渝則教窮理極將必與正應合而屯遭班馬皆所不必計也

屯如遭如是正意乘馬班如是屯遭之象揔言其不能進也

初之難二非欲爲寇以二近已欲爲婚媾康屯之情可見矣
然人之妄求橫逆者可却殷勤求好者難辭于此持正不許
方見君子之守不字不字于初也乃字乃字于五也男子寇
而字女子筭而字臣之從君猶女之適人也○東坡曰六二
志欲從五而內忌于初故屯遯不進矣夫初九屯之君也非
寇也六二之貞于五也知有五而已苟異于五者則爲吾寇
而已吾焉知其德哉故以初爲寇而曰吾非與寇爲婚媾者
也然且不爭而成其女子之貞則初之爲德至哉

象曰六二之難乘剛也十年乃字反常也

六二中正有應豈其不能進哉屯遯之難所乘者剛耳乘剛而
不與至于數窮理極得復正應之常其守亦足稱矣

乘在其上也剛初九也以爻位言只迫近于初耳常正應也以正自守終久必通故曰反常

六三卽鹿无虞惟人于林中君子幾不如舍往吝

濟屯必恃才德而有應援六三胥失之矣妄行取困其所必然者君子當此幾不如舍去之爲愈若往則徒取羞吝而已

廓清宇內如射獵然不貪不幸一守虞人之法此其善物也六三反是故陷于林中而鹿終不可得矣○君子幾不如舍幾者動之微吉凶之先見者也人皆有此幾而率昏于利惟君子養定識明一見輒有分曉故就六三之昏于欲者提出君子幾不如舍之詞以醒之而在恐其必不知止故復戒以往吝吝者自吉而向凶之謂如此爻惟入于林中凶矣然却

有可以吉的道理在不見此吉幾而必往凶由此起矣故曰
憂悔吝者存乎介

象曰卽鹿无虞以從禽也君子舍之往吝窮也

大抵經綸以濟屯吾盡吾事耳何可萌貪幸之心六三卽鹿无
虞由其心之從禽利令智昏故也君子舍之君子之幾也不見
幾而必往自取羞吝以至于窮矣曷尤哉

從者以心從之之謂是心貪乎禽也貪心勝故不免于躁无
虞之謂也舍則不往往則必吝之謂幾

六四乘馬班如求婚媾往吉无不利

有經綸之責者必仗陽剛之才六四陰柔不能有爲欲進而復
止其若此屯何故擬象于乘馬班如然大臣之濟屯不必盡出

于其身也初九守正居下以應已是名世之英而抱援天下之具者求之以尚往屯其可濟乎故與之吉无不利

六四近君故宜進陰柔无力故復退乃以乘馬班如象之震爲長男婚媾之象求者四求之也吉无不利連看能濟事曰吉而吉之中又无不宜曰无不利往者往以濟屯也

象曰求而往明也

訑訑自足而妨賢者闇于計也六四求賢而往旣知天下之屯責成于吾身而不敢以用其智又知當世之傑克成濟世之功而不敢以蔽其賢可謂明也已矣屯其乃亨乎

卦例上爲往下爲來明兼自知知人上

九五屯其膏小貞吉大貞凶

值屯之時先沛膏澤以收人心九五坎體爲膏本可弘施于天下者而陷于險中屯歛不發是所謂聚財殖貨之君也君而惟利是啗于一身之計得矣于天下大計何財聚而民散貨殖而身亡其凶必矣故曰屯其膏小貞吉大貞凶

人君計一身是小貞計天下是大貞屯其膏者計一身不計天下非經綸之大道也是就小大而別其吉凶一說小者必貞而後吉大者雖貞亦凶甚言其不可也

象曰屯其膏施未光也

天下待膏澤于君若望雲雨之施屯而不發其施未光也何以解天下之鬱積乎然則君心之屯卽世道之屯矣

上六乘馬班如泣血漣如

屯无不可濟之理而才之弱應之失又處于時之不可爲未有能濟者也然則上之乘馬班如其大異于二與四乎終自傷悼而已

象曰泣血漣如何可長也

變則通通則久易道也屯不自振至泣血漣如馬變通安在哉而何可長者所以深悼之也

換論

卦中二陽皆可爲主但五坎体陷而失勢初震体動而得時故初又爲屯主六爻皆從初立意彖言利建侯者其事也利于建初以爲侯也久言利建侯者其人也初之才利建以爲侯也只是以濟世安民爲主便是行正便是居貞

三三三蒙亨匪我求童蒙童蒙求我初筮告再三瀆瀆則不吉利
貞

此卦以坎遇艮山下有險蒙之地也內險外止蒙之意也故名
爲蒙蒙昧也物生之初蒙昧未明也然亦豈終于蒙哉蓋聰明
可以開而悟也義理可以啓而明也是有亨道焉願所以亨之
者何如耳卦体九二爲內卦之主而與六五陰陽相應故凡亨
蒙者非我可往求童蒙也乃童蒙自來求我也及其既來之後
凡有所叩必如初筮之誠則告倘如筮之再三則瀆我矣瀆尚
可以告耶至其所以發之道又必皆出于正以孝弟忠信之
事仁義道德之理涵育而培養之然後蒙可亨也

童蒙求我猶是執轡撫衣來及門耳至于初筮方是攷德問

業有所即請大抵筮者初心果是專心致志欲憑所值以決吉凶若再筮三筮則以初者爲未足憑而有疑二之心矣其在童蒙非有初問再問之云也只是即問意思當極精專不可疑二如筮者再三耳利貞蒙者之所利而亦發蒙之利也亨以蒙者言以下主發蒙者言

蒙曰山下有險險而止蒙○蒙亨以亨行時中也匪我求童蒙童蒙求我志應也初筮告以剛中也再三瀆瀆則不告瀆蒙也蒙以養正聖功也

卦名爲蒙者其象山下有險則地之所處旣不得以自伸其德內險外止則心之所運又不能以自達皆蒙之義也曰亨者蓋蒙者物誘未加天真欲動固有可亨之道因其可通迎機而啓

之斯沛然矣匪我求童蒙童蒙求我者禮聞來學不聞往教五
之志自應于二相孚契之深也初筮告者二有剛中之德師嚴
則道尊也再三瀆瀆則不告者蓋問至于再三而亦告之則非
惟蒙者之瀆我而我亦爲瀆彼蒙矣故不告也而其爲利貞曷
取焉蓋學者學爲聖人而已聖人之所以爲聖者正而已入聖
之域雖在將來而作聖之功正在今日當蒙時養之以正雖未
卽至于聖而聖域已由此而漸開矣此所以利貞也

卦詞亨字旣主蒙者說則彖詞以亨亦就蒙者可亨上說行
時中者不先不後時雨之化也使非蒙者之可亨則時中之
教將安施哉志應雖專主五應于二然二因其來學亦有俯
就之意相孚契也剛中重剛字不重中字只是師道剛方必

待其誠而後告之也。漬蒙者非徒无益而反害之也。發蒙卽
養蒙。教之以正者自有培植涵養意思在。聖功乃功夫之功。
非功效之功。○李卓吾曰：方其止也，混混沌沌，莫知所之。童
蒙如此，聖人亦如此。雖欲不止，其可得乎？故曰：山下有險，險
而止。蒙夫以險而止，則必以亨通而行。及其行也，聖人如此，
童蒙亦如此。雖欲不行，又可得乎？故曰：蒙亨以亨行，時中也。
言時止卽止，時行卽行，卽此便是時中。聖人與蒙无異矣。此
以止字形容亨通。○東坡曰：蒙者蔽于物而已。其中固自有
正也。蔽雖甚，終不能沒其正。將戰于內，以求自達。因其欲達
而一發之，迎其正心，彼將沛然而自得焉。苟不待其欲達而
強發之一發，不達以至于再三，雖有得，非其正矣。故曰：匪我

求童蒙童蒙求我彼將內患其蔽卽我而求達我何爲求之
夫患蔽不深則求達不力求達不力則正心不勝正心不勝
則我雖告之无自入焉故初筮告者因其欲達而一發之也
再三瀆瀆則不告者發之不待于欲達而至于再三也蒙以
亨行者言其一通而不復塞也夫能使之一通而不復塞
者豈非時其中之欲達而一發之乎故曰時中也聖人之于
蒙也時其可發而發之不可則置之所以養其正心而待其
自勝也此聖人之功也

象曰山下出泉蒙君子以果行育德

山下有泉出而遇險未知所之若人蒙稚未知所適者也曰蒙
蒙有養正之義故君子以果行育德體之見善必遷聞義必徙

不畏難而苟安庶幾日有就月有將涵育此德以底于成是君子之所以善体蒙也

育德工夫全在果行上果行言夫此心之必行也育德者行有所得于心從容涵泳之也此是君子自家工夫泉者必行之物然出于山下涓涓未達亦多游衍之意

初六發蒙利用刑人用說桎梏以往吝

初六在下近比九二剛中之賢故有啓發其蒙之象然發蒙之初利用刑人以正其法庶小懲而大誡蒙可亨矣若舍脫其刑人惟以和悅徃教之蒙豈能發哉吝之道也

陽明陰暗上明下暗初六兩重暗故利用嚴梏說脫桎梏是以寬濟之殊欠直截

象曰利用刑人以正法也

教之法不可不正故利用刑以懲戒之使其有所嚴憚也

九二包蒙吉納婦吉子克家

以道覺斯民者要咸歸于化育之中而其術在因人以造就九二任斯世之責剛而不過盡天下之顧蒙而包容之有得于敷教在寬之道者且以陽受陰隨蒙者之所至而成就之有得于因材施教而薦之道者世有若臣焉非庶之蒙其盡啓乎君父之托其不虛乎故周公再命之以吉而以子克家與之

君子能包容天下之蒙方盡得吾之分能成就天下之蒙方盡得吾之事故皆與之以吉能承君父之托而不孤其厚望方是克家之子故曰子克家

象曰子克家剛柔接也

上不委任卽有師世之猷其安施下不能堪其任卽有君父之託其安稱二與五相應而相成故夫子以剛柔接也申子克家之意

子克家以九二之才言也剛柔接以九二之得伸其才言也九二上遭際于五而六五下委任乎二也

六三勿用取女見金夫不有躬无攸利

六三陰柔不中正全奪于外誘者雖聖人與居不能化而入也故曰勿用取女見金夫不有躬无攸利

勿用取女言莫用婚娶此女也曷以故言其見金夫而卽喪其身也娶以爲配祇足貽閨門之玷而不能成內助之功何

利之有此全是假象

象曰勿用取女行不順也

順者赤子之真純童蒙之吉順以巽也謂真純未整而克順也
利用禦寇上下順也謂由此以保真純而克全此順也六三陰
柔不中正全奪于外誘而喪其真純是行之不順者所以不可
教與

舊說作慎字與後二順字不相協似非夫子之旨○婦曷以
可納順在也女曷以勿可娶順亡也

六四困蒙吝

蒙者之得亨全賴明者之開發六四不得剛明之師安望其能
通乎所謂困而不學民斯下者吝不符言矣

象曰困蒙之吝獨遠實也

陽實陰虛實謂陽也六四上下皆陰蒙之甚者也欲從九二則隔三欲從上九則隔五遠隔于實者也故曰獨遠實獨者言本卦之陰皆近夫陽而四獨遠之也

六五童蒙吉

六五柔中居尊下應九二則不恃聰明渾然一赤子之心不知貴倨凜然承師傅之訓而其德業之成就有日進于聖賢而不知者故曰童蒙吉

以剛柔接合觀之此爻宜作幼冲之主

象曰童蒙之吉順以巽也

易稱童蒙順以巽于二也順則真純之不鑿可施輔翼之功巽

則拂逆之不形也佩剛中之誠此其德業之成就安可量哉

順卽柔中翼卽應乎九二

上九擊蒙不利爲寇利禦寇

上九治蒙過剛有擊蒙之象雖然顧所以擊之者何如耳若取
必太過攻治太深則擊之乃所以害之何利焉惟捍其外誘以
保其真純則其擊之者乃所以激勵長進之也何不利之有
爲寇者是責之以所未能知肝未能行也禦寇者爲之保護
其良知良能也爲寇寇在我也禦寇寇在彼也

象曰利用禦寇上下順也

上之剛不爲寇而止寇上之順也下之人因其所止而止之下
之順也蒙可亨矣

利字正因順字意上下皆順此所以爲利也

䷄ 需有孚光亨貞吉利涉大川

乾坎合体之卦剛健而不陷于險其名曰需需者待也天下事有不得不從容以需待者祇恐其心之欲速行之苟且耳心若誠定而有孚是真能待也則中常泰然有光明洒落之休事能循理而守止又不苟于待也則行皆盡善有体信達順之効卽以當天下之大事此孚此貞自可以通人心達事理而不患其无功者故曰利涉大川

誠是能需曰孚中孚而不失其正曰貞光亨就心言便有吉意在吉就事言是本此光亨來涉大川是當大事之象本此孚行此貞天下大事自不難集所以復許其利涉○程傳云

五居君位爲需之主有剛健中正之德而誠信克寔于中有孚者也有孚則光明而能亨通得真正而吉也以此而需何所不濟雖險无難矣此作一氣說其義亦長蘇紫溪云需一卦是聖人涉世學問中庸言素位而行而極之夷狄患難正是此道理有孚光亨貞吉是胸中養得到見得到乃所以能需勝有孚誠也一真爲主萬感不入也光亨明也樂天知命故不憂貞居易俟命順受其正也此皆天德用事止于至善吉道也故不特安常處順坦然自如卽變故之臨如大川然亦无入不自得矣何利如之本程傳

彖曰需須也險在前也剛健而不陷其義不困窮矣○需有孚光亨貞吉位乎天位以正中也利涉大川往有功也

天下事成于安詳而敗于欲速需之云者須之義也坎爲外卦
險在前也其可以不須乎乾以剛健臨之欲速躁妄之不萌微
幸苟且之不事如此豈陷于險又何復困窮之有此需之義有
關于天下國家之大者詞曰有孚光亨貞吉何取哉九五雖在
險中與乾同体剛健中正故卽其位則天位也居尊臨卑操可
以取必之權而語其德則正中也天德用事不萌夫躁急之私
是以其中常泰其事常正而亨吉之効有必然无疑者卽此而
往往則无不可致之治无不可集之功而况其小者乎故曰利
涉大川往往有功也

論做事須奮精神以向往論處事須耐心志以待時需須也
正從容寧耐以待之之謂也險在前政見其需剛健不陷正

見能需之善聖人以義處事故曰其義不困窮○陰躁之人
妄行取困而不知也陷于險剛健之人見得明守得定寧守
正以俟時不行險以僥倖故必不至于陷○天下事皆須盛
耐而況治天下三年有成必世後仁可急遽以求其効乎九
五位天位而正中无爲守正忘見小欲速之私精一執中絕
苟且計功之念其存心必誠而作事必正此有孚光亨貞吉
利涉之詞所由係也正中渾看爲妙不必分貼孚貞此因位
天位句故以人君治天下言之利涉大川雖本卦象來夫子
詔意只一氣往有功者本此孚貞而往也○需是徹上徹下
的道理傳曰位乎天位以九五得天道之純耳天道卽乾卦
位乎天德非重在尊位也正中二字乃天道本然如此人而

正中則純夫天而不問以人矣大都人之一心稍有未瑩世
昧得以溺之近利得以動之禍福利害得以恐之憧憧後後
之不暇而何以能需一純夫天則如太虛流行萬境洞徹順
逆禍福直視之爲晝夜之序矣而安得不需故曰君子居易
以俟命需也小人行險以僥倖不需也此天人之辨也

象曰雲上於天需君子以飲食宴樂

雲上於天時而形雲密布時而飄忽太虛皆不過順其自然而
无一毫安排急遽于其間此需之義也君子脩其在己聽其在
天坦坦蕩蕩于朝夕之間一切盈虛得喪皆是浮雲太虛境界
何必戚戚遑遑爲哉故曰需者飲食之道也

飲食宴樂只是形容孚貞之外无所作爲也

初九需于郊利用恒无咎

需以去險遠近爲深淺初未近險而九陽剛則可恒者故其詞曰需于郊以郊曠遠之地世情不染物累不撓也守此恒而不變明哲以保其身何咎之有

象曰需于郊不犯難行也利用恒无咎未失常也

患難亦人所時有但不當犯難耳君子置身于名利得喪之外而游神于恬淡閒曠之鄉自不犯難何難之及耶常者吾心之至一乎常乎也明常明也正常正也常固常變亦常也烈風迅雷而天之常自若世故紛錯而心之常自若吾不失吾常何咎之有

失常便犯難

九二需于沙小有言終吉

二漸近于險故曰需於沙沙者水之所必至也而剛中能需雖不至于喪身敗德而小有言語及之然又當自定何必介意故終吉

人之處世非直變故之衝易以震撼卽是非口舌險于風波亦不能不閑情者要之求全之毀何損日月之明也

象曰需于沙行在中也雖小有言以吉終也

需于沙若近險矣乃其心寬然无入而不自得譽不加密毀不加踈故雖小有言而以吉終也

初可以遠害而不可以濟時止得无咎而已三則太迫險而致寇使非敬慎敗且不免况望其他乎惟二進不入泥退不

在郊虞將用未用之際而又以剛處中與五相應異日濟險必是此人需之至善者也然目下所虞未免致人之疑初則疑其不能退而達有所避三則疑其不能進而大有有所爲所以小有言語及之而天下之險卒賴以濟故曰終吉王輔嗣所云近不迫患遠不後時者也

九三需于泥致寇至

泥迫近水將近于險矣寇之地也三居健體之上才位俱剛進不顧前密邇于坎故有需泥寇至之象占者其可不慎乎象曰需于泥災在外也自我致寇敬慎不败也

外謂外卦災在外者言災近己身而在目前也災在外而我迫之是致寇自我也若能乾乾惕若敬而且慎則亦不败矣

敬慎不敗尚救得一半也乾三爻皆剛健不陷然其中亦有分別初之无咎其以恒乎二之吉其以衍乎三之致寇其未知敬慎乎初如伯夷太公待天下之清二如郭有道之脫于難三如范滂李膺等之罹于災是也

六四需于血出自穴

四交于坎已入于險故有需于血之象然與初爲正應仗其乾剛之力不陷于險是出自穴也雖險不險矣

穴中而出故曰出自穴猶云至自某處非得初陽之力不能濟也

象曰需于血順以聽也

聽者聽乎初也六四柔得其正順也柔順聽乎初故入險不險

九五需于酒食貞吉

凡治不可无勵精盡治之心不可有欲速計功之念九五陽剛中正以居尊位其所當爲者已无不爲矣今但酒食以需之而已此需之貞也三年有成必世後仁其所馴致乎故曰吉

需者時也此時更何所爲只可安靜以俟之而已酒食卽大衆飲食宴樂貞卽彖之孚貞

象曰酒食貞吉以中正也

求治太急以內多欲也九五中正其所養者純所守者定雍容不迫若出于性成者肯以治之既施亟亟然盡効乎

此中正卽彖傳正中

上六入于穴有不速之客三人來敬之終吉

上六陰居險極无復有需是陷而入于穴者三陽需極而進其不速之客乎則終賴其力而可獲吉矣天下事儘有意望之外而藉以成功者要在明敬之之義也

不能需而入于穴是勢所必至者是上之本等敬不速之客是理之所當然者亦是上之本等素患難行乎患難正是此等事故无入而不自得必冀望于意外之來或來而不能待之以禮則行險僥倖者之所爲也

象曰不速之客來敬之終吉雖不當位未大失也

以陰居險極爲不當位然能敬不速之客或可仗其成功未大失也此所以終吉

三三訟有孚窒惕中吉終凶利見大人不利涉大川

乾坎合体之卦剛險相接天水違行曰訟文王曰訟非人之得已也必有孚而見窒方宜辯以自直耳是不兢兢惕于中乎惕中則必不求勝焉而吉若終事以求勝焉則凶夫一吉一凶若此其昭哲也見大人則據理者可以獲伸而利涉大川則好剛者終以冒險而不利夫一利一不利又若此其明著也訟者觀其變玩其占則剛心勇氣必退自消沮而安處理之常勝矣有孚窒是原其所爲訟者見訟之不得已也惕是警惕訟者之心令之自畏懼也惕中卽有不終訟意終訟者惕中之反也見大人則是非曲直有所歸命涉大川則是不問虛實不擇利害而爲之者○訟之卦只是欲使人无訟耳訟人之心不可有自訟之心不可无人人有訟世之所以无訟也夫訟

不過爭曲直之間耳縱使吾心无他吾事本寔而爲持勢所
沮不得自伸猶恐是非一開禍害立至且退而自訟惕然自
動其中心則偏陂好惡不形于内而能置身于不爭之地吉
道也必欲終極其訟爭端從此結矣非凶而何然世必有使
民无訟之君而後有无訟之民大人以中正爲觀于上而民
快睹于下道德齊禮忘是與非斯世之利也不然者上无明
王下无良民舉斯世而入傾險之俗淪胥于淵而莫之止矣
其何利之有

彖曰訟上剛下險險而健訟○訟有孚窒惕中吉剛來而得中
也終凶訟不可成也利見大人尚中正也不利涉大川入于淵
也

卦彖以訟名上剛而乘勢以陵下下險而挾奸以伺上是訟之由也且內險而蓄其陰謀外健而張其血氣亦訟之由也訟則非美事矣彖以有孚窒惕中吉與之謂卦體之九二剛來而得中也陽寔陰虛有孚明甚陽陷于陰窒而知思故其始非无情後非求勝則吉也又彖以終凶戒之謂訟之不可成也不如其已也又彖以利見大人尚九五之中正則无偏聽之患也又彖以不利涉大川謂以剛而乘險有入淵之危也究所以成之由教所以訟之道委曲開譬必令相安于无言靡爭之地是聖人之所以生萬民者與

訟本是无情者是无忌憚者是必欲求勝者何取于有孚惕中蓋九二剛來而得中則其所存主者一誠自然知儆惕而

不窮其事故以此詞與之九二剛也坎在需爲上卦在訟爲下卦剛來者自外卦而來也惟剛而中所以不克訟訟不可成是論其理也尚中正入于淵俱以訟者言尚主也卽利見之意入淵則入愈深而愈險也夫使以爲淵者訟之過也難未有不始于爭今又欲以爭濟之是使相激爲深而已尚中正卽是惕蓋中正者无私也入于淵卽是終訟入淵者不返也

象曰天與水違行訟君子以作事謀始

人情兩相合則和兩相違則競天與水違行訟之意也君子曰訟不起于訟之時起于始之不慎而終至于爭也故凡所作事必謀其始順乎天理合乎人心而无有議其後者訟端斯可絕易經可說

矣衆人知其著求伸于相違之時君子知其微特慎于作事之始吾以是知聖人之慮遠也

天與水始只是一氣至行相違而天淵隔矣作事謀始不謀之違行之後而謀之未行之初欲其念念皆純乎天而不入于淵也大凡天下之事未有不始于微而成于著者吾人之心未有不慎乎始而能令厥終者一念而慎則如火始燃如泉始達而禮讓之風成焉一念而不慎則涓涓不息星星不滅而爭競之俗熾焉故曰事有終始慎獨始无訟終也不謀始而終凶宜矣○易因曰天爲三才之始水爲五行之始君子法之作事謀始凡事有始有中有終訟中吉終凶能謀始以絕訟端而中與終不必言矣

初六不永所事小有言終吉

當訟之時所事在訟初六陰柔居下不永所事蓋畏惕之心勝而非逞雄剛以窮極其訟者比也卽小有言終可獲吉矣聖人于訟之初而善其中止也若此

象曰不永所事訟不可長也雖小有言其辯明也

訟非美事原不可長者初六有見于此雖小有言其辯終當自明矣故不永所事而終吉

不可長長者必至于成也故以爲戒

九二不克訟歸而逋其邑人三三戶无眚

九二陽剛爲險之主本欲訟者也然得下之中旣知其理之不必逞而上應九五又知其聽之无所私故當訟而不克志自處

卑約以求免焉蓋明義理識時勢而非世之不量以求勝者之
可及也吾何有焉

述其邑人三百戶狀其自處之卑約耳不則是猶有競心也
歸而通其云看從旁觀者之詞其字作于字看災患之謂青
象曰不克訟歸而逋也自下訟上患至掇也

二之不克訟則歸而逋竄矣其故何也上下本无訟也九五在
上至公无私若猶曉曉而不服則是以下訟上矣患之至非自
掇之耶

此原二所以歸逋之意本利見大人來

六三食舊德貞厲終吉或從王事无成

六三與上九爲應舊德也二與四欲援之而強施德焉爲二者

但知有上九而已不知有二與四也故曰食舊德夫惟其知有上則貞而二與四若將甘心之則厲然厲不勝貞而終得吉也其或從上之事則不敢專成惟上九之所命不然恐有成功之疑也○三若舍上九而从二四訟端起矣

象曰食舊德從上吉也

三之食舊德者惟從上九則吉也豈宜他有所往哉

九四不克訟復卽命渝安貞吉

人而好訟則其心與正理相背馳矣九四以剛居柔是訟而不克者而反就于至理渝變其心安處于正之人也人惟循理守正吉隨之矣

命是原賦于天之正理終身不可違者故曰復貞是今日所

宜處之正理卽訟不可成者也故曰渝綏復而卽便渝而安此先後句法之妙也四以不克訟爲復非必旣失而後復只不克訟便是安貞便是不失曰吉者亦皆不失之意蓋以理之得失爲吉凶非以其事之得失爲吉凶也

象曰復卽命渝安貞不失也

夫人患不卽命耳安貞耳復而卽之渝而安之何所失哉

九五訟元吉

五居尊位爲聽訟者以其中正之德化乖戾之俗而訟自歸于无訟忘言靡爭此大善而吉也

不曰聽訟而曰訟言訟者遇之而无訟所以爲元吉所以謂之利見大人若以聽訟盡善爲元吉則小矣

象曰訟元吉以中正也

五之能使民无訟者豈有他術哉惟其德之中正而已中則不偏正則无邪使民无訟之道也

上九或錫之鞶帶終朝三褫之

上九剛居訟極不勝不巳終訟者也凶其固然設使終訟而勝望外之獲或有錫之以命服者然以訟得之其能安享耶不崇朝而三褫之矣是成亦敗也得亦失也何貴終訟哉

錫帶出于或然見其无必勝之理終朝不免于三褫見其有必敗之道

象曰以訟受服亦不足敬也

夫以訟取勝而受服也周公以爲必見奪夫子以爲設或不見

奪亦不足敬也若思其不足敬之心尤可耻于三禩矣

東坡曰六三上九之配也二與四嘗有之矣不克訟而歸于上九上九之得之也譬之簞帶奪諸其人之身而已服之于人情有褻焉故終朝三禩之既服之矣則又禩之愧而不安之甚也二與四訟不勝者也然且終于无肯與吉上九訟而勝者也然且有二禩之辱何也曰此止訟之道也夫使訟者自多其勝以夸其能不勝者蒙其惡訟之禍吾不知所止矣故勝者禩之不勝者安貞无肯此止訟之道也

三三三師貞丈人吉无咎

坤坎合体有順而險之義其名曰師文王曰師非聖人之得已也不正可乎必也順天人行吊伐而所至若時而是貞也是師

之第一義也然將非其人所係不小又必重專城嚴授域而惟當世之丈人任焉斯師出有名而威靈著兵行有紀而勝美昭可以奏蕩平之績而免于窮黷之說也所謂吉无咎者蓋如此用師之道在得正與擇將而已不得其正則師出无名不擇其將則將不知兵故必以正而任老成之人纔吉无咎○貞丈人不平對貞是行師大主意丈人是其中大節目吉以事言戰勝而攻取也无咎以理言非窮兵而厲民也

彖曰師衆也貞正也能以衆正可以王矣○剛中而應行險而順以此毒天下而民從之吉又何咎矣

興師必以衆師者衆也動衆必以正貞者正也卦体一陽居中五陰皆所左右具茲義焉行師者誠以仁義之心行誅討之事

而左右其民之一于正則可以順天心答民望而爲天下王矣然必重丈人之選何取焉卦體剛中而應不柔不猛之德簡在帝心卦德行險而順爲弔爲伐之師匪違民志以此老成之將除殘于天下民不謂毒而樂從之功成于一舉難靖乎四方矣吉又何咎哉師貴貞而又重丈人之任蓋如此

此以卦體卦德釋卦詞衆者卽周官五人爲伍積而至于二千五百人爲師也正卽王者之兵行一不義殺一不辜而得天下不爲也以者爲能左右之也左右之使衆人皆正樵採无犯之意斯足以宣布人君之威德卽王者仁義之師矣此就一氣說下師之貴貞也剛中句重剛中行險句重而順此老成之德也爲將者不剛則怯過剛則猛所以貴剛中也兵

危道也故曰險順順人心也坎險坤順以卦德言○師勞民傷財所過荆棘其毒有不可勝言者以此毒天下而民從之東征西怨南征北怨亦不過是蓋毒之者乃所以安之民所深願而樂從者也民悅而從所以吉而尤咎

象曰地中有水師君子以容民畜衆

地中有水衆聚之義師之象也君子曰師豈一時所能聚哉旁觀黎庶皆吾捍衛要在容而畜之耳是故授之本業而生聚之日繁教之倫理而信義之日結居常則上下以相保有事則守望以相援人可爲兵家可爲守不必征求調發而恒桓之衆卽在此元元之民矣以是知君子之善爲衆也以容之之道畜之也

民與衆非二也容與畜亦非二也君子但盡容保之道耳古者寓兵于農全是此意畜者積聚于內而人不見之意如水之行于地中而人不知也

初六師出以律否臧凶

初爲師之始出師之道全在紀律之嚴明士知畏法而趨避如其不然整齊之謂何凶之道也

惟其用師之始故具此二義

象曰師出以律否臧凶也

律者法也法一則衆齊法嚴則衆懾師之出誠不可不以律者一失其律衆志懈矣其何以禦敵哉此周公所謂否臧之凶也失律正解否臧二字○一說否臧凶者師出不可不以律否

則雖滅亦凶也古文善兵爲滅本此

九二在師中吉无咎王三錫命

二有剛中之德膺六五之任此將在師中威足以懾衆志而奮
勇常先恩足以結戎行而衛心匪懈計其策爲萬全處其任爲
克稱誠吉且无咎者帝心能勿眷乎殊恩異數渚加于授鉞之
後盖所錫命至于再三矣非夫人曷克當此

此將而在師中猶軍中有一韓之謂也王三錫命則信任之
專可知此卽彖詞之剛中而應

象曰在師中吉承天寵也王三錫命懷萬邦也

古未有寵任不加而大將能立功于外者二之在師中吉承天
寵也亦未有君心不在于天下而特寵乎元戎者六五之三錫

命懷萬邦也君懷萬邦而任之將將承天寵而効之師天下自此无事哉

懷萬邦者惟恐民之不安故任將以伐暴而救民也不然其所寵者爲好惡之私矣

六三師或輿尸凶

將先重已而量敵六三以陰居陽不中不正才弱志剛而犯非其分敗衄之禍或所不免矣是凶道也

輿尸言載尸而歸也○程傳云輿衆也尸主也三在二上失位乘剛故象之言大將不主而二或主之也五爻弟子輿尸卽此此亦一說

象曰師或輿尸大无功也

師以戰勝爲功至于輿尸豈直无功而已哉聖人不忍生靈之禍故讀此而大咤之如此

六四師左次无咎

師進爲勇退爲怯苟度德而量力有雖退亦勇者六四是也四之不勝任在陰柔不中其能左次在居陰得正聖人不重戰功故于四之全師特與其无咎

師三宿爲次右爲前左爲後左次言退舍也度不能勝故完師以退

象曰左次无咎未失常也

知難而退師之常也四未失焉又何咎

六五田有禽利執言无咎長子帥師弟子輿尸貞凶

无故而發兵端者不祥六五用師之主柔順得中不爲兵端者敵加于已不得已而應之若田有禽者然利執言以伐之則其整師旅所以惠生靈于理乃爲无咎不然不可師也然而元戎之寄曷可不慎焉長子帥其師已復參之弟子至輿尸而歸雖貞其亦凶也念生民之命係于師又念三軍之命懸于將則于出師命將之際必重其事而不敢輕者矣

田有禽傷我禾稼不可不一驅除之寇賊變夷之戕我生靈猶是也執言者奉詞之謂也長子卽九二在衆人謂之丈人在君謂之長子也弟子新進小人之類參以弟子則長子之才有所牽制而不得自主故輿尸貞卽田有禽凶卽輿尸也象曰長子帥師以中行也弟子輿尸使不當也

中德到處皆善而師爲尤要老成之將馭士以威撫士以恩此
中行也慮勝而進知難而退此中行也所裨于生靈國計匪小
一使非中行者剛柔進退悉違其道膏血塗原野矣其可哉
中行深美乎二之德也使不當歸咎于五之詞也

上六大君有命開國承家小人勿用

師終順極正論功行賞之時也於是大君有命開國承家以慰
其勲勞矣其中有小人者寧優之金帛弗用以厲國家之命焉
公爵土而不私斬封叙而非吝周公盖有深意于其間哉

功大者開國功小者承家開國者命之開啓其國承家者命
之承守其家也師旅之初効勞之人其才不一故或有小人
焉行賞則不可遺分茅則所當慎如光武雲臺之將得與公

卿叅謀大事者惟鄧禹賈復數人而已

象曰大君有命以正功也小人勿用必亂邦也

人臣捐軀以効廓清之勞亦斬列之甸采以明激勸君无命焉
不幾缺望乎命之開國承家小大有倫後先必序乃所以正此
功也功正則悉當授封矣而曰小人勿用者何也小人如鷲如
虎用之以搏擊或可以効能用之以撫綏必至于肇亂大君方
敘功能以安天下而用此亂邦者以禍天下其若蒼生何所爲
別懸賞格以待之封土則必不可授也噫慮深哉

東坡曰夫師始終之際聖人之所甚重也師出則嚴其律師
休則正其功小人无自入焉小人之所由入者常自不以律
始惟不以律然後能以奇勝夫能以奇勝者其人豈可與安

居師休之日將錄其一勝之功而以爲君侯大夫亂自茲始
矣聖人之師其始不求苟勝故其終可以正功曰是君子之
功耶小人之功耶

總論

六爻初與四對初戰四不戰也二與五對二將五將將也三
與上對三敗事上成事也然初明軍律二三四別將品五慎
兵端而專任上大封賞而簡庸總之則所謂貞丈人吉无咎
也

比吉原筮元永貞无咎不寧方來后夫凶

卦体一陽居尊有上下相比之義夫普天率土歸命于天子言
可知矣然以一人當天下之比則必思所以比天下者不特筮

易經可讀 卷之十
之而再筮之爲元爲永貞誠体具于我則仁德之流行不息斯
可以長人而无咎而始之反側不寧者方且聞風而歸附焉若
後夫負固不服祇自取其凶也噫吾但問吾之君德備于已者
何如而彼之來者後者豈容心哉

原再也言推原如初筮再三卜之詳審之至也元天德也仁
也永貞卽元之不息者也元永貞是我所自有的我原筮而
卜其果有于已方无愧比人之責故曰无咎不寧卽向之未
歸者此卦承師而來故有不寧之輩新附于我也後夫言衆
來而彼獨後梗化之流也故自取凶不寧方來後夫凶明言
比于人者何以亦屬比人者夫子告葉公問政不曰近者悅
遠者來乎本義若欲比人則亦以是而反觀之此語是上意

○蘇紫溪曰比之原筮猶蒙之初筮不過反之本原之地而求一點寔心耳君道莫先于仁大哉乾元至哉坤元天子休元只是一仁字曰永貞只是常守此仁而不變耳不寧方來是儆戒之意古之聖人不曰吾德已盛吾治已至而周遊于佚不敢荒寧之戒且兢兢焉敢曰吾元永貞矣无咎矣而遂宴然无所戒懼哉要必乾乾惕厲无敢少寧然後吾之精神日與天下相貫而天下方來歸也後夫與元永貞相反蓋不以吾身先天下而反以天下後吾身荒寧自恣非夫也故凶按此說專主君身上講

彖曰比吉也○比輔也下順從也○原筮元永貞无咎以剛中也
不寧方來上下應也後夫凶其道窮也

比曷以得吉比有比輔之義也卦体一陽居尊下皆順從溥海內外固不率俾此吉之所由係也曰原筮元永貞无咎曷取焉以九五之剛中也剛健中正乃乾元之德而生生之理也此理其于心必体之極純用之无息者此元永貞所由取也曰不窳方來言上下之胥應耳曰後夫凶言其道之窮耳民不應則道窮君不足以致民之應則其德亦必有未盡此原筮元永貞之占文王所爲致懇也

比吉也三字非衍文傳曰惟天生民有欲元主乃亂故一家必有一家之主一國必有一國之主而況于天下无主則亂有主則治此比之所以吉也比輔也是足此意剛中就得天之初言乾曰大哉乾元萬物資始又曰大哉乾乎剛健中正

是剛中者天德也。原筮元永貞者，反求諸初而純乎天德也。不可以剛屬元中，屬永貞未發之中，卽元也。永貞卽剛中之不怠者耳。

象曰：地上有水，比。先王以建萬國，親諸侯。

水與地原不容有間，故曰比。先王通天下爲一身，亦寧有間乎哉？建之萬國，封同姓異姓爲諸侯，以親之。上下一體，內外相維，將必大其德澤，旁皇于四海九州之內者，是先王比天下之道也。

建萬國者，立公侯伯子男之國也。親諸侯者，上而巡狩下而述職，朝聘往來以親之也。當重一親字。親一體而分親，親則合爲一體。君與民亦一體而分親，諸侯而各親其民，則合天

下爲一體○師地中有水水藏乎地中而不可見也聖人法之藏天下于天下得容民畜衆之道焉比地地上有水水行乎地上而可見也聖人法之以天下治天下得建萬國親諸侯之道焉

初六有孚比之无咎有孚盈缶終來有他吉

初六比君之始筮仕之初必其誠寔不欺纔反諸心而无愧故曰有孚比之无咎夫此有孚之心徹表徹裏力量充滿若盈缶焉則在上鑒知之寵必有出諸意外者終來有他吉矣

盈缶非初之孚尚淺必積而後滿也盈缶方是有孚稍虧分數卽非有孚有孚之心安望獲吉哉初无心于吉而吉自來他吉之謂也

象曰比之初六有他吉也

比之初六有孚而且盈正故不但无咎有他吉也

曰比之初六則有孚盈正俱在內了曰他吉則无咎不待言耳

六二比之自內貞吉

六二柔順中正養之有素上應九五則其比之也一本脩諸已者效之潛干獨者獻之若比之自內者然是得人臣之正而可以承天子之知遇矣吉之道也

此內字雖本內卦來然非空空无意義若曰此自內之所自者比之云爾如以外爲已仕內爲未任不必用自字矣

象曰比之自內不自失也

徇人者失已二自內而比之所謂幼學壯行者也何失之有

六三比之匪人

六三陰柔不中正承乘應比匪其人蓋不獨其人之過也
自比之耳

象曰比之匪人不亦傷乎

比人一節所係非細若匪其人身心德業奚賴焉不亦傷乎蓋
深痛之之詞也

六四外比之貞吉

四委質爲臣身已在外樂得九五明君而柔順以比之此輔弼
之芳規也明良喜起其再見矣故貞吉

外字雖本外卦來然亦有講解人臣一通仕籍此身便屬于

外致吾身以比明主更无内顧之念此方是外比之義○本卦獨九五以陽剛爲賢六二以正應而比之故曰內六四以相近而比之故曰外其爲貞吉則一也

象曰外比於賢以從上也

九五賢君也四之外比豈徒以其賢哉君臣大分亦以安其從上之分耳

九五陽剛中正故曰賢居尊位故曰上

九五顯比王用三驅失前禽邑人不誡吉

大君以一人比天下務公天下而不私光明正大是比天下之所當知者吾盡吾道而无意于民之歸臣亦喻吾意而不斷于民之歸若王用三驅失前禽邑人不誡者然是顯比之道也是

大順大化之治也故曰吉不然亦伯者之驩虞已耳其奚以比天下

顯比顯然光明正大无私也言比我者无私而我亦非違道以要民之比也王用三驅以下是顯比之象邑人不誠亦主在君上說使邑人不喻王意而惟恐有失之之心則禽无遺類德亦不廣矣○王用三驅設三面之網卽天子不合圍也失前禽邑人不誠言禽之去者聽其自去邑人不相儆戒以求必得也

象曰顯比之吉位正中也舍逆取順失前禽也邑人不誠上使中也

顯比之吉王者大順之治也是遵何德哉九五位正乎中所存

一光明正大之心所行一光明正大之事既无我與人之迹亦
无人德我之望故舍達取順而失前禽也其臣亦无獲心若邑
人之不誠盖由上之中德使之化于中耳乃稱顯比哉

正中與中正不同凡言正中者所處正得中也言中正者得
中與正也中无定在在比時卽光明正大之心顯然无私也
使中若或使之中而君不知也入網而來者爲順喻向化也
不入網而去者爲逆喻後夫也舍達取順只是聽其去來无
成心耳

上六比之无首凶

凡居上比下貴有所以首天下者上六陰柔居上无以比下是
比之无其首也其何以得民哉凶道也

象曰比之无首无所終也

比有首天下之德方可以保其終比之无首亦安所終也

三三小畜章密雲不雨自我西郊

以巽畜乾固爲陰畜陽以一陰畜五陽亦爲陰畜陽畜係畜也
言要結而制畜之也此小人用卑與謙柔之術以要結衆君子
而制縛牽係之使不得上進者也文王之意謂小人方欲係畜
君子然卦有內健外巽剛中志行之善是君子之道猶自通也
故係之曰亨夫惟君子不與小人合則小人之畜未極而施未
行故又曰密雲不雨自我西郊以示爲君子者當知所自重勿
竟爲小人所畜而得遂其施也

君子小人不並立滿朝皆君子一小人敗之而有餘故卦以

一陰而名小畜亨指君子言以君子處之之善其道猶可亨通耳○天地之氣東北陽也西南陰也雲起東北乃陽倡而陰和故有雨雲起西南乃陰倡而陽不和故无雨此所謂畜未極而施未行也

○小人之人雖以陰道柔術係畜君子而君子爲其所欺亦不覺牽係之然幸以其剛健性成却未嘗翕合附和譬則陰氣雖密而陽不與和猶未成雨焉如此是爲小人者徒自勞其思慮自費其謀術譬則陰氣徒自起于陰方而已故曰密雲不雨自我西郊本義畜未極而施未行蓋陰畜而陽和則畜極而成矣今陰畜而陽不和是其畜未極也惟畜未極則陰道雖施猶未行也此卦本名小畜所謂畜未極施未行正

卦中所蘊小畜道理也

彖曰小畜柔得位而上下應之曰小畜○健而巽剛中而志行乃亨○密雲不雨尚往也自我西郊施未行也

君子畜小人也而事有大成其常者小畜是已六四柔得其位善用巽以羈縻而上下諸君子不覺爲其所籠制是小畜之義也君子不得志之日也而文王易以亨與之卦体九五巽穀自勝而巽順以通其情誠定有孚而居位以行其志此乃君子之所以得亨也以其得善處之道也故密雲不雨而君子之勢猶得以尚往自我西郊而小人之施未行于君子也使其施一行卽欲尚往曷由焉噫亦危矣哉

柔得位指六四上下應指五陽蓋六四之柔得位正卦之所

以爲巽也得位不作乘權秉軸者以陰居陰爲得位一味柔順柔順最能惑人故曰上下應應者爲所惑而受其係畜也○健是嚴剛決斷有主張的人巽是順理和行不憤激壞事剛中卽有孚也陽寔陰虛剛中便有孚志行是居尊得位猶足以展布其猷爲此二句惟九五當之蓋九五雖居巽而寔與健同体故曰健而巽不必云內健而外巽本文却无內外二字剛中志行卽有孚攣如富以其鄰此寔君子之領袖也乃亨乃字難之之詞言有此數善方可得亨不然亨未必也密雲不用二句二意從亨字看出來陽氣上升不與陰合故密雲不用尚往者世不可一日无君子君子不可一日不用干天下是欲行其道不與小人和合也如是則其施未行小

人之勢到積滿處便橫潰奔溢不可捍禦茲尚微淺而不得施故未能行于君子耳其詞若幸之其意則全是危之也

象曰風行天上小畜君子以懿文德

風者天之命令也風行天上猶未行之于下畜而未合小畜之象也夫言貌者亦君子之命令也外雖文采之可觀內由性術之根抵非文德而何君子飭而美之其出乎身而見于外者中禮中度有像有章而極其盡善焉則將起敬起畏于人不言而喻不動而威若風行天上而无跡矣

一卦有一卦時用卦體乾下巽上風行天上據其一時景象如此耳不須推到風有氣而无質能畜而不能久爲言也文德者德之見乎外而著于容貌詞氣之間如天氣之下著也

懿文德者達暴慢去鄙俗必使中程中度雍容文雅極其懿
笑如風行天上盡去其痕翳而天氣極其清明也須知此君
子不可目定爲小畜君子但因小畜之象而就君子身上尋
出个則象耳○陰陽相錯而文生焉君子以乾之体合巽之
柔炳然文章條理之可觀也然不徒曰文而必曰德者見文
乃德之輝非粉飾于外已也

初九復自道何其咎吉

乾体三爻志欲上進而爲陰所畜者初九與四相應又有生平
之雅未能忽然幸其以正自守不爲所畜是抑情就理以復于
道義之公故曰復自道如是而光明正大不愧不作亦何其咎
哉而且主張在我勢可尚往以有爲矣故曰吉

士君子立身全以道爲主持此道一失未有不爲所浼者初
與四應其相入最深却能堅介自守不受牽制故曰復自道
復歸還也何其咎者據其所爲全是理了又何咎哉不爲陰
所畜就是无咎就是吉

象曰復自道其義吉也

易以道義配禍福初九復自道固无咎矣于義又得吉也

義得吉包无咎在內了言此吉非倖致也

九二牽復吉

一漸近于陰若爲所牽係者然以其剛中則知道義之正而不
可枉也如是亦可以得吉

初與四正應故雖爲所係畜于情分是有不容已者二非正

應以其相近而牽係明是自家上欠主張了幸其体剛中故能復之于正然但得吉而不得无咎易王義理重无咎也

象曰牽復在中亦不自失也

二之牽復異于初矣猶幸中有執持亦如初之不失也

初之復以剛正也二之復以剛中也故曰牽復在中中則不自失了玩亦字分量去初已遠矣

九三輿說輻夫妻反目

初二皆畜于陰而復二畜于四而不復者比而悅之也陽无失道陰豈能畜之哉故其始而與之比也溺于一時之私其旣而與之爭也激于一時之忿進退胥失之矣聖人不著其占也但係以輿說輻夫妻反目之象蓋亦深悼之也夫

與脫輻不能行也脫輻非惡意陰陽相悅不肯行也然二陽剛豈終不行四柔善畜終不使之行則必與之爭爲夫妻反目之象反目者反轉其目不能相視也

象曰夫妻反目不能正室也

男正位乎外女正位乎內謂之正室三四苟合豈能其室哉所以有反目之咎

六四有孚血去惕出无咎

六四以一陰畜衆陽包藏禍心而欲加害乎善類究之身家之禍豈能免哉祇自懷憂恤而已然幸近于九五君子之有撻當者倘能革其非心輸誠納款而保全乎衆正則其血去惕出于義又何咎矣

血陰物四多懼血去則惕出矣有孚孚于九五也四雖柔巽然得正頗知義理者故以无咎與之○舊說謂以柔順之君于畜二乾強暴之小人雖易不可爲典要亦不當自相矛盾乃爾

象曰有孚惕出上合志也

保全善類九五之志也四能不加害而輸心于我則與之合志矣又何疑懼之有

剛中志行卽此志字

九五有孚攣如富以其鄰

九五處尊其勢分本崇高也而以陽居中是其中心至誠有以攣結乎衆志者故六四陰柔甘心而爲之用所謂如身之使臂

臂之使指惟其左右而群陰咸爲之服役矣以此而扶眾正裕如也聖人著之詞曰有孚攣如富以其鄰所以深慶之也

此有孚卽剛中攣如固結也四爲成卦之主而五又用乎四故曰富以其鄰鄰指六四富字不甚重但言効力者衆耳四雖陰當小畜之時力量甚重故曰富

象曰有孚攣如不獨富也

人患中孚之不足耳苟有孚則其鄰皆爲我左右矣豈獨富哉不獨富卽以其鄰可見君子不貴自用但出一片寔心雖小人亦爲之用也

上九旣雨旣虜尚德載婦貞厲片幾望君子征凶

上九畜極而成不用者旣雨矣尚往者旣虜矣此曷以故時方

尚陰而尊其德以至于載故至此極耳以陰論制君子非義也若婦制其夫雖貞而亦厲也以陽論陰已盛如月之幾望矣君子之征也不亦凶乎慎无執尚往之說罹小人之阱阱也

此爻詞全本卦詞來文王就大槩看曰密雲不雨自我西郊周公就極處看曰既雨既處君子征凶統是爲君子謀○既雨既處尚德載皆責脩君子既雨是與小人和合既處是不能尚往尚德載是尊尚乎陰德而至于盈滿如稱頌功德之類是也曰婦日月皆陰象征卽尚往也此時尚往則禍隨之矣

象曰既雨既處德積載也君子征凶有所疑也

夫曰既雨既處陰德積而至于載也曰君子征凶陰盛抗陽有

所疑而不可行也

有所疑本德積載來君子道亨乃无所疑茲陰極盛爲君子者已一歩行不去故有所疑德積載與尚德載異尚者陽尚之也尚其德至于載言小人陰謀詭道暗結人心日積月累以至于盈滿也○大畜畜之大故畜極而通小畜畜之小故畜極而成

三三履虎尾不咥人亨

至柔者兌至剛者乾以柔而履夫剛之後躡之而進此危恍也蓋乾剛之人其性健其分尊本不可易者也吾惟和悅而順承之則是此以開心見誠而上應彼以慷慨毅直而相容庶乎免于禍患而不至于傷害矣有履虎尾不咥人之象故亨

卦只是履本柔履剛影出一個履字便有危意在履虎尾踵其後也含有欲進的意夫剛健的人爲吾所承事及利害難處之處皆虎尾也不必以乾爲暴乾自屬陽明邊吾惟以善處之何傷害之有不惟无害且得躡之而進因以濟事故亨

彖曰履柔履剛也○說而應乎乾是以履虎尾不咥人亨○剛中正履帝位而不疚光明也

履曷以名柔履于剛之後也剛固不可犯也柔非所履而履不幾于蹈虎尾乎而曷以不咥人亨兌之柔固有悅之之道乾剛在上而悅以應之彼以其剛吾以其順彼以其殺吾以其和相應而不相拂未有觸其威遭其咥而不得進者是以履虎尾不

聖人亨蓋卦體九五陽剛中正而居尊位此所謂乾之主也德與位稱履之而不疚煥乎治道之光明矣爲下者苟能和悅以應之則何功不可濟何事不可成此其所以亨與

柔履剛亦以乾兌言於柔履剛見非所履而可危於悅應乾見善所履而可享受病處在此得力處亦在此悅而應乾下順乎上陰承乎陽天下之正理也○剛中正履帝位而不疚揔說德足以稱位一氣不斷光明也方是許之之詞蓋德僅相稱自然治道光輝發越處○悅而應乎乾一節釋卦詞已至此是夫子看得卦中有這段履帝位的大道理故特舉而之以見乾之爲乾者此也

象曰上天下澤履君子以辨上下定民志

觀天澤之象人所當履昭然矣世有驚而越之者良由心志之不定也君子辨上下之分若天澤然有不容假借者上下之分明則民志自定上安乎上之分下安乎下之分各履其素而罔越于尋常矣

人心志最是无涯不爲之防多所踰越名分其可弗辨乎辨上下不徒在禮凡政刑法度之正名辨分者皆是物也民字當人字着蓋上下分明然後可定民志民志定然後可言治初九素履往无咎

素本質也本分也初以陽在下居履之初未爲物遷率其素履以往無一毫踰越乎分外者如是則名利之害不入于胸中道義之守不渝乎平日无咎之道也

素履是平日往是率此以行也君子素其位而行窮如是達亦如是更不改其所履故得无咎

象曰素履之往獨行願也

士之平素就能无願而一奪于紛華世故則能行其願者亦少初九素履以往乃得行已之所願而不願乎其外也

獨行願自遂其志之謂東坡曰君子之道所以多變而不同者以物至之不齊也如不與物遇則君子行願而已矣

九二履道坦坦幽人貞吉

道若大路坦然其无疑者一失所履舉步皆荆棘矣九二剛中在下无應于上其所履惟此道焉而坦坦平夷更不入于陂險傾陷之地是謂幽人之貞而非僥倖求進者之可倫也居易俟

命中常泰然不亦吉乎

幽人貞三字連讀出而不改其素達士之貞也居而不易其守幽人之貞也履道坦坦是幽人之貞故云○九二剛中見得道理分明故但平穩行去不見崎嶇斯人也幽人也世外之人也幽字最有致言與世不干涉

象曰幽人貞吉中不自亂也

富貴利達易入其中而亂二剛中灼有明見確有定守中常自治不自亂此爲幽人貞而得吉也中一自亂而履非其道矣安所稱幽人哉

中字胸中之中不必以剛中言凡人之驟逐于名利由自家无主張耳誰得而亂之故二曰不自亂只不自亂便見其幽

六三眇能視跛能履履虎尾咥人凶武人爲于大君

慎履者在明審在安詳而猶以爲未也六三不中不正柔而志剛本不明而強以爲能視本不善所履而強以爲能履不陷于危幾乎履虎尾咥人凶必矣其孰與于此哉武人爲于大君剛復而乘勢有不肖明視安履者正此爻之謂也占者可若武人之暴乎悅而應乾三致思焉可也

眇能視三句是象武人爲大君是舉其人以寔之陰非武而曰武位非君而曰君柔而志剛下而志上之通患也詳見下文總論

象曰眇能視不足以有明也跛能履不足以與行也咥人之凶位不當也武人爲于大君志剛也

履先明視眇能視不足以有明也左貴謹行跛能履不足以與行也啗人之凶由其位之不當也武人爲干大君由其志之剛也

志剛本位不當來位不當者柔居剛也爻以位爲志

九四履虎尾愬愬終吉

大臣之近英王若履虎尾然而四以剛居柔庶幾知乎兢惕之道者其操存也翼翼畏其承順也肅將愬愬焉不敢以自寧終可奉威命佐英風而得吉也詩曰小心翼翼其此之謂乎

三履虎尾以乾爲虎而三在其後也四履虎尾則以九五爲虎而四在其後也大抵自兌視乾剛則爲虎自乾三爻視之惟五以剛居剛謂五爲虎亦可也三四不中不正相同但三以

柔處剛是柔而志剛四以剛處柔是剛而能柔此吉凶之異也○眇能視跛能履悅而應乾者之反也懇懇則進于悅而應乎乾矣三四改革之際故申言之懇懇不是空恐懼凡事要周悉停當纔得吉

象曰懇懇終吉志行也

大臣之履而進也曷志哉君有中正之德則思以翼其成君有夬履之厲則思以匡其失要在此心之祇敬耳四也主之以懇懇卽承英明之主而其志未有不得行者故終吉與

履主于行故以志行爲吉與初九行願義同

九五夬履貞厲

九五以剛中而履帝位是有可爲之資而挾可爲之勢矣又下

應與體爲臣下者皆容悅而承順故有夬履之象然有所恃必有所害雖使得正亦危道也

夬決也慨然以天下之事爲可爲三張太過之意蓋夬與履皆乾兌上下相易之卦夬履者在履而當夬位也此九五卽剛中正履帝位者但彖合言之故與其光明爻分言之故戒其貞厲

象曰夬履貞厲位正當也

九五居至尊之位挾剛正之勢復何所顧忌哉自任之決蓋由于此

位爻位也陽剛中正而居尊位正當也以其位正當所以夬履以其夬履所以貞厲此亦憂盛危明之意

上九視履考祥其旋元吉

上九在上爲履之終周公立之訓曰人之吉凶何常惟履之歸故必視已所履于終而考其祥焉果能盡美盡善周旋无虧斯可當天心協人望爲大善之吉不然而末路一失其爲終身之玷者豈少哉

視履回視而詳審也祥者善之徵而福之兆也視履便有害不善何以曰考祥善人之常也祥亦人之常也不善不祥非人之常也大傳曰吉事有祥此之謂也上九居履之終涵養已到造詣已深屬善已十分但更須圓滿純之又純周旋曲折无不中禮乃爲元吉

象曰元吉在上大有慶也

人之制行初心勇猛欲得元吉易末路多盈欲得元吉難元吉在上則彌高彌邵愈久愈精不惟有慶而且大有慶也所謂樂只君子德音不已樂只君子胡不萬年者此耳

上者卦之終也在人事爲操履究竟處君子于操履之終休徵純集更无不祥之行則其福慶大矣大有慶方是寔說福

總論

彖詞既說悅而應乎乾是以履虎尾不咥人亨是明與六三契体能承乾矣剛中正履帝位而不疚光明也是明與九五之德位相稱矣爻中又何說出眇能視及夬履貞厲等語豈不自相矛盾耶夫履禮也上天下澤冠履之分昭然而不可易故六三契也澤也九五乾也天也悅而應乾下順乎上陰

承夫陽此上下之分明而民志所由以定也但三爲巽主一味容悅而以陰居陽志寔不小且初二二爻爲素爲幽甘心恬退獨二有心而行事者漸躡之而進九五雖剛健中正而高明之君必多踈略恃才獨斷而同体之九四則爲懇懇上九則爲考祥大都是保功名惜名節一邊而三復何所顧忌哉吾恐太阿漸移而天下事日去矣故聖人係之詞曰眇能視跛能履履虎尾咥人凶武人爲于大君以痛抑之欲其知凶而但當悅以應也曰夫履貞厲以醒惕之欲其危懼預防而終保帝位不疚也秦政待堅豈无尊位豈不強決而李斯趙高慕容超之倫率用柔巽而終移奪其大物矣此其明鑒也

三三泰小往大來吉亨

卦名爲泰泰者通也乾下坤上天地交也天地交而萬物通矣文王喜而係之詞曰泰之時何時也陰小者往而在外矣陽大者來而居中矣君子當軸而用事小人俛首而聽令焉宗社生靈長久之計皆由此建而行无不得是吉亨之道也

小大者陰陽之分往來者消長之機卦名爲泰以不可相无之陰陽言詞曰小往大來以淑慝之陰陽言也惟天地交則小往大來矣其理一也○吉亨二字不宜分蓋吉而且亨者深與之之詞也

彖曰泰小往大來吉亨則是天地交而萬物通也上下交而其志同也內陽而外陰內健而外順內君子而外小人君子道長

小人道消也

最難得者泰最難見者小往大來茲曰泰小往大來吉亨則是天地之氣交而萬物囿于化機者莫不通暢也上下之情交而一心運乎天下者莫有異同也以氣言之陽明用事陰翳无由而並干矣以德言之剛健爲主人欲特因而聽命矣以世道言君子在內以主持而小人不敢以參列其間矣君子之道其日長乎寢昌寢熾行將利澤天下于无窮小人之道其日消乎寢微寢滅卽欲肆其禍无由者是泰之著也小往大來之寔也是吉亨之徵也世際于斯真世道之慶哉

造化之運關乎世道世道之否泰關乎君子小人易之大分凡爲陽爲健剛毅不屈者必君子也凡爲陰爲順依阿委靡

者必小人也然其本係之于君身君德剛健其所喜者必剛健之士而陰柔之小人屏跡矣君德陰柔其所用者必陰柔之人而剛健之君子遠于朝矣是故上下之所以交者以小人道消也無所以間之之故也上下之所以不交以小人之道長也有所以間之之故也○則是二字直管到末天地交二字似申泰字而小往大來之義卽具于中內陽以下似申小往大來吉亨而泰之善寔徵于此只渾融說爲是○天地之形不可交而以氣交氣交而物通者天地之泰也上下之分不可交而以心交心交而志同者人事之泰也○陰陽以氣言和煦者爲陽慘烈者爲陰陰替陽爲事而揔歸于生育便是內陽而外陰順健以德言剛強者爲健柔靜者爲順順

佐健以行而撓屬其專成是內健而外順陰陽是卦體健順是卦德體猶人身也德猶人心也○時非皆君子也君子秉軸主持與陽健者同是曰內時非无小人也小人俯首聽命與陰順者同是曰外大凡信而任之則曰內踈而遠之則爲外長者一步長一步消者一步消一步消長者道也往來者道之與時爲循環也

象曰天地交泰后以財成天地之道輔相天地之宜以左

右民

乾下坤上二氣訢合造化之泰也后曷以成之天地生民民生于天地固也而一氣渾淪莫之區畫卽天地之道不成而其宜不著民雖欲利賴于造物曷由哉后卽一氣之渾淪者而定之爲四時正之爲四方均節劑量成其爲天爲地之道而輔相存

焉天時所宜若何以用其時地利所宜若何以因其利輔之相之以左右斯民使群生于大造中者各道天地之道宜天地之宜而无一之不得其所然則泰贊之功焉可誣也匪天地之交泰不啓匪后之財成輔相泰不成天人相與以成泰如此

后元后也道就其体之自然而言宜就其用之當然而言財成者因其全体渾淪而裁制之如氣化流行籠統相續聖人則爲之分春夏秋冬之節地勢廣遠經緯交錯聖人則爲之分東西南北之限此裁定天地之道也輔相者隨其所宜而贊助之如春生秋殺此時運之自至高泰下稻亦地勢之所宜聖人則示人當春而耕當秋而歛高者種黍下者種稻之類此輔相天地之宜也左右者扶植之意扶植以遂其生俾

其亦如天地之通泰也陽左陰右本有此象故曰左右裁成
卽輔相輔相卽左右是一套事是一氣說○生生篇曰財成
輔相但就元后身上說不可分過不及天地之渾然者爲道
其當然者爲宜易曰天地之道貞觀者也中庸曰天地之道
爲物不二茲道也卽吾身固有之道亦人人所共有者也天
宜尊地宜卑天宜健地宜順五常五典皆天經地義之不容
易者宜也卽吾身當然之宜亦人人共以爲宜者也元后身
中渾然一个天地爲能舉天地之道化而裁之嘿而成之渾
渾全全无少欠缺是裁成天地之道也所謂誠者自成也元
后一身擔當宇宙行五常敦五典舉天經地義一一闡而明
之是其輔相天地若人臣之輔相其君者然也裁成其道而

使天下之人皆率由于其道輔相其宜而使天下之人咸利
用于其宜蓋以天地人物爲一已非離已以爲天地人物也
按此可脩一解

初九拔茅茹以其彙征吉

三陽有連進之義一君子進而倡和後先如茅斯拔以其類焉
上下志同財成輔相皆自此始矣其吉何如哉

茹相連引之貌三陽同志皆欲上進初爲類首舉則類從

象曰拔茅征吉志在外也

士君子志在蒼生彼此同之者也拔茅征吉蓋以此志決之耳
君子之志在天下不在一身故曰志在外惟志在天下故獲
吉不然則亦樹黨而已○一說外指外卦之陰蓋初與四相

應上下交而志同初之志其在茲乎詳見四爻

九二包荒用馮河不遐遺朋亡得尚于中行

九二剛中上應于五是輔治之大臣也大臣之度汪洋不測納污藏垢故曰包荒然太平之日過于操切非也習于因循亦非也當斷不斷奸弊叢生故用馮河以擬其勇焉凡爲宗社蒼生計久長者必使四海之遠常在目前萬世之慮常如一息固不以遐遺矣然大臣視天下之人无非吾人苟喜其所親則何便者至昵其所賢則窺嚮者集故又曰朋亡朋亡者開誠布公之体宜爾也摠之一中盡之矣此中非他卽爲君之所深願于我臣隣者六五中以行願而二之不剛不柔得配合之所謂上下交而志同者非耶泰寧之治可長保矣

包荒非故包容荒穢也要知此荒穢自是不能不有不容不包者今試以土地譬之能使一國之中市井衢巷村落山林一无污穢去處乎故凡臣工中脩飾所不到檢點所不及或行已踈畧每有過謬失錯處與閭閻百姓愚而无知頑而難化及事體瑣細未盡如法者皆荒穢也此其理有難以責備勢有難于取必自不容不包者若分別太過人情不堪吾見忠厚日喪而治道漸衰矣故用汪洋以蓄之惇大以容之蓋所以崇寬大之體養和平之福也馮河是狀其勇正與包荒對泰寧之世天下習爲偷安燕雀處堂危亡之機往往伏于此故以精銳果決勇于飭治爲貴蓋所以塞敝壞之竇昭明作之功也不遐遺者不以遐而遺也四方萬里之遠民生有

未盡獲災變之所由生也窮荒絕域之外夷情有未盡安懷
華之所由萌也側微隱陋之下賢才有未盡舉壅蔽之所由
致也太平无事君相徂于自逸鮮有念及者故當廣詢博訪
深思遠慮而不之遺則亂亡不生于遐遠矣朋亡言亡其朋
比也夫分黨與則門戶立而攻擊生矣庇門生故吏則奔競
開而僥倖作矣阿近戚中貴則法撓于上而令阻于下矣但
當盛時君相牽于人情鮮有能自割者故湏持正秉公據理
行法而亡其朋比則亂亡无肇于形迹矣夫天下之事真不
有大中至正恰好盡善的道理保泰之道包荒也用馮河也
不遐遺也朋亡也乃其正當恰好可使天下常泰而无否者
也今信能然是有以合乎中行矣析是四者而各正各一其

中合是四者而不偏共成其中故謂之中行尚如尚王之尚
言與之配合也中卽六五中以行願之中○東坡曰陽皆在
內據用事之處而擯三陰于外此陰之所不堪也陰不能堪
必疾陽疾陽斯爭矣九二陽之主也故包荒用馮河馮河者
小人之勇也小人之可用惟其勇者而荒者其无用者也有
用者用之无用者容之不遐棄也此所以懷小人爾以君子
而懷小人其朋或以爲非也故曰朋亡然而得配六五有大
援于上君子所以愈安也雖亡其朋而卒賴以安此所以爲
光大也按此說用馮河句較長暴虎馮河自是小人之勇
象曰包荒得尚于中行以光大也

九二之包荒得尚于中行何以哉以其心之光大也心体光明

則能照察乎人情世故之微而不蔽于一偏心胸濶大則能善
藏乎神明變通之用而不吝于所施此其所以得尚于中行也
心不光大中无定裁安望其能此哉

包荒句内馮河不遐遺朋亡俱有了此與或從王事知光大
也一例

九三无平不陂无往不復艱貞无咎勿恤其孚于食有福

聖人憂盛危明故當泰將過之時卽爲之戒曰无常平而不陂
謂泰將傾也无常往而不復謂陰當復也平者陂往者復則泰
爲否矣當思夫天理之必然而自盡夫人事之當然勿玩豫以
恬也其難其慎而持之以艱勿縱逸于邪也惟幾惟康而守之
以貞若是則何咎之有將見德踰于祿雖盛而不滿勿恤其期

之必至而泰寧之福自可常享矣爲人臣者當思所以亟固之哉

艱者勞心焦思不敢慢易之意貞者謹守法度不敢邪僻般樂之意庶于理无咎也○一說恤者憂也孚者信也言不憂此理之可信也食者吞于口而不見也福者福祿也有福者我自有之福也食有福者天祿永終之意其詞曰居今泰之世者承平旣久可謂平矣无謂平而不陂也陰往陽來可謂往矣无謂往而不復也今三陽旣盛正將陂將復之時矣故必艱貞而守正庶可以保泰而无咎焉若或不憂此理之可信而无艱貞以守之是自食盡其所有之福祿矣可畏之甚也按孚字自是好字眼此說較長

象曰无往不復天地際也

際者交際也外卦地內卦天天天地否泰之交會正在九三六四之際也其可无艱貞以處之哉

易因曰聖人知致泰之道在乎往來之交則知往來之間亦非久長之道而泰難常保不可以不慮也故于內卦之三外卦之上獨申言之天地際者言天地交際也夫天地之交一交卽散一際卽離斷不能久蓋平陂往復必然之理神妙迅速自非人之所能致力然知其如此而盡人事以保之亦可以回天也按云天地際自有人事存焉三才闕一則非是六四翩翩不富以其鄰不戒以孚

六四柔順得正當泰之時陰向乎內已交泰乎陽矣故三陰翩

下而于陽不敢自王爲不富以其鄰不戒以孚之象

翩翩飛貌言三陰群飛而來也小畜曰富者乃陽爻也此曰
不富者乃陰爻也言不待挾之以富而其鄰從之者甚于從
富不待戒之以令而其類信之者速于命令也從者從乎陽
也信者信乎陽也言陰交泰乎陽也陽欲交泰夫陰故初曰
征二曰尚陰欲交泰乎陽故四曰不富以鄰不戒以孚言乃
中心願從乎陽也此四爻正陰陽交泰所以說兩個願字象
詞上下交而其志同正在于此若三與上雖正應然陰陽之
極不成交泰矣故三陽之極則曰无往不復所以防城復于
隍于其始六陰之極則曰城復于隍所以表无往不復于其
終二復字正相應○隣指三陰字指三陽言順于陽也

象曰翩翩不富皆失實也不戒以孚中心願也

陰虛陽實陰往于外也又三陰皆失其實矣今來與陽交泰乃中心之至願也故不戒而自孚

易因曰泰小往大來吉亨者言致泰之道但小大交相往來則小者吉大者亨可常泰矣故初九身在三陽之下處泰之初而即志在外之陰欲以來交于小連接三陽以其類進故致四等翩翩相信而小大交也夫三陰皆不富而失寔宜若與陽不相孚應今反翩翩然往交于陽此豈有戒令徵發哉中心之願不戒而自孚也

六五帝乙歸妹以祉元吉

泰已成矣陰陽交會五以柔中而下應九二之剛中上下交而

其志同故有王姬下嫁之象蓋太平之福祉四元吉可坐致也

九二之陽上交于五如舜之尚見于帝故曰得尚于中行九二之中行卽指六五中以行願也六五之陰下交于二如帝女之下嫁諸侯故曰帝乙歸妹治泰之事惟九二主之六五獨享其成而已故九二爻詞言事而不及福六五爻詞言福而不及事君臣之相與有成如此○帝乙卽微子之父殷之賢君書曰自成湯至于帝乙罔不明德慎罰是也史記云帝乙時殷道益衰言與經背不知何故注易者因史記之言遂以帝乙爲成湯儒者信史疑經其謬如此

象曰以祉元吉中以行願也

人主孰無保泰之願而不能遂者以中德之未足耳六五系中任賢而行保泰之願以祉元吉非倖也理也

中者中德也陰陽交泰乃其所願故二曰尚五曰歸一往一來之意也二曰中行五曰中行願上下皆中正所謂上下交而其志同也四與諸陽心相孚契故曰中心願五下嫁于陽則見諸行事矣故曰行願惟得行其願則泰道成矣故元吉上六城復于隍勿用師自邑告命貞吝

夫世道積累而成泰猶平地積累以成城也城復于隍則平日積累之功廢于一旦泰轉而否矣當此時而欲窮兵黷武殘民以逞豈完計耶惟當急于自治新其號令更其憲訓庶可以圖回天命也如自以爲是而守之不變則積隳成壞不可收拾亦

足羞哉

舊說卽貞亦吝非是

象曰城復于隍其命亂也

上六何以城復于隍蓋由綱紀陵夷法度廢弛其命亂也可不
齒之于卑耶

三三否之匪人不和君子貞大往小來

成天道則成人道天地不交而爲否則无復人道矣君子之貞
曷利哉何也大者往小者來滿朝皆小人君子未有能自全者
是故君子宜以爲戒也

匪人言非人道也君子自是正的故曰君子貞大往小來與
泰正相反

彖曰否之匪人不利君子貞大往小來則是天地不交而萬物不通也上下不交而天下无邦也内陰而外陽内柔而外剛内小人而外君子小人道長君子道消也

卦名否而大往小來則是天地不交而萬物不通有天地之形而无萬物之用也上下不交而天下无邦上下之志不同紀綱法度莫之遵守卽有邦亦无邦也内陰而外陽肅殺爲主而陽明特退聽矣内柔而外剛人欲爲主而天理特緣飾矣内小人而外君子小人當權以用事而君子日踈遠矣是小人之道長而君子之道消安得不否也

健順皆好字故改作柔剛其餘皆泰之反

象曰天地不交否君子以儉德辟難不可榮以祿

二氣不通閉塞而成否君子當斯時也可自張大以取小人之禍乎儉損其德以達避其難豈然不可榮以祿是君子之否也否而亨者也

儉儉約也歛其道德之光也不可榮以祿全在儉德避難上不可二字宜深玩猶云不可得而親不可得而疎也苟非儉德則人因德而榮其祿小人忌之禍且立至矣可不戒歟初六拔茅茹以其彙貞吉亨

當否之時三陰連類而上進其勢也苟非合交以害正則其貞也初知此義受福不淺矣斯所謂吉亨乎

天下不可无君子有君子斯成世道而小人陰受其福初惡未形而反之便是知理義了所以亟與其吉亨

象曰拔茅貞吉志在君也

初六拔茅貞吉何也取其志之在君也志在已則不知有君而何恤乎君子志在君則不知有已而何比乎小人其志一君子之志其貞一君子之貞故其吉亦君子之吉也小人之善變者益如此

此原其初進之心也雖小人貪進其初志亦欲得君乘其志而變其正乃吉之道

六二包承小人吉大人否亨

君子者小人之所承也六二陰柔而中正知君子本吾所當承者不加排擠而包容焉小人之吉道也若大人則儉德避難安守其否而後道可亨耳慎毋以小人之包承而自失其守哉

否卽儉德避難之意亨者其道不屈卽是亨此非爲君子幸
深爲君子危也

象曰大人否亨不亂群也

大人身否而道亨何也以不亂于小人之群也小人者自有小
人之群倘以其包承而比昵之未有不爲其所亂故必儉德避
難焉斯可矣

君子者豈能絕不與小人爲群哉妙在不亂耳

六三包羞

小人暗傷善類常蒙世之訾議卽其心亦竊羞焉六三以陰居
陽雖志于傷善而猶自知其不可也則其所害正而可羞者尚
包容而未發矣使其乘間得逞君子豈能免哉見幾而作斯其

時矣

包羞者包其所羞也三以陰居陽一點天理未之漸滅故以害正爲可羞而包藏不發耳蓋初志尚淺二猶柔順至三則地位深純是小人了故聖人看一羞字以動之使終包藏而不發則亦君子之幸也然爲君子者豈可因其不發而嘗試之哉惟有否亨而已

象曰包羞位不當也

六三何以謂之包羞蓋其所居陰爻已深黨邪害正非一朝一夕之故可畏也亦可羞也包藏不發幸矣

以位不當而鄙其未能者非是

九四有命无咎時離祉

有命謂造化在我也否極泰來固天命之常然君子不諉之天
而在我者有以潛移而默奪之是天之權且爲我用謂之有
命可也无咎者天之所祐人不得而違之也疇類也離麗也社
言文明之福也如此則不獨一身賴之將疇類皆離其社所謂
釋闇智以登于光明而吾道大有慶矣

命天命也卽无往不復意也否極而泰雖是天命九四妙在
不極其剛不亟亟報復之意潛消嘿奪造化在手而人不知
命自此始自此立故也故曰有命无咎俱見成字眼以无咎
爲着力與他不同者非是疇離祉善類蒙福也盖小人之嫉
君子必嫉其類惟時天命方回而君子之勢尚微使一君子
方進遽見怪害事必然貽禍衆人都不得進此古今通患也

然則九四方當天命轉回之初其既據當固甚重乎故聖人特致意焉

象曰有命无咎志行也

陽之志在行因否而滯四始復之故喜之也

志者開泰之願行者轉否爲泰

九五休否大人吉其亡其亡繫于包桑

陽剛中正以居尊位是能休時之否以爲泰者大人之吉也然泰之復可喜也而寔可愍使一有安存之心能保其不亡乎故今雖反泰嘗虞其不保曰其亡其亡矣吾所基命而定業者必繫若苞桑之固而後可保其不亡也聖人于休否之時卽爲深慮遠戒也如此

桑之爲物其根深固苞乃叢生者其固尤甚

象曰大人之吉位正當也

休否在有位而左在德稱其位九五位正當則其所經綸所維繫自足以開泰而能保其不亡者故曰大人之吉位正當也

上九傾否先否後喜

陽剛居否極能傾時之否者也曰先否後喜深慶之之辭

休否之力全在九五此直從而傾之故特見其喜

象曰否終則傾何可長也

否終則必傾豈有長否之理物極而反其常也

易經可說卷之一終